

# NA YAWU YESU

## KWISAKA MPE BOKILAKA



Mu zola tanga, na Santu Jean, kapu 11, kubanda na nzila ya 18.

*Ntangu yayi mbanza Béthanie wandaka pene-pene na Jerusalem, pene ya ba-kilometre tatu.*

*Mpe ba-Juifs mingi ya Jerusalem kwisaka na Marthe na Marie na kukatula bawu mawa ya lufwa ya mpangi ya bawu ya bakala.*

*Na yawu Marthe, ntangu yandi kuwaka ti Yesu kumaka pene-pene ya mbanza, yandi kwendaka kukutana na yandi: kasi Marie bikanaka na yinzo.*

*Na yawu Marthe tubilaka Yesu, Mfumu, kana nge vwandaka awa, mpangi ya munu ya bakala zolaka kufwa ve.*

*Kasi mu zaba ti, ata na ntangu yayi, nionso yina nge ke lomba . . . Nzambi, Nzambi ke pesa yawu na nge.*

*Yesu tubaka na yandi, Mpangi ya nge ya bakala ke vumbuka na lufwa.*

*Marthe tubaka na yandi, mu zaba ti yandi ke vumbuka na lufwa na kilumbu ya nsuka.*

*Yesu tubaka na yandi, Mu ke mvumbukulu, mpe . . . luzingu: yandi yina ke kwikila na munu, ata ti yandi me kufwa, yandi ke zinga:*

*Mpe konso muntu yina kele zinga mpe yina ke kwikilaka na munu ke kufwa ata fioti ve. Nge me kwikila mambu yayi?*

*Yandi tubaka na munu, Yinga, Mfumu: Mu ke kwikila ti nge ke Klisto, Mwana ya Nzambi, yina fwana kwisa na yinza. (Beno tala yawu!)*

*Na yawu ntangu yandi tubaka mutindu yina, yandi kwendaka, mpe yandi bokilaka na kinsweki Marie mpangi ya yandi ya kento, yandi tubaka, Mulongi me kwisa, mpe yandi ke na kuyufula nge.*

<sup>2</sup> Beto sambila. Tata ya Mazulu, siamisa Bandinga yayi na bantima ya beto, na nokokila yayi, mutindu beto ke vingila Nge na ntangu yayi. Beto ke pesa na Nge, Ndinga ya nge, kisadi ya Nge, mpe kitini yayi me tangama, na Nkumbu ya Yesu Klisto. Amen.

Beno lenda vwanda.

<sup>3</sup> Kikuma yina me nata munu awa ya ke samu na kumeka kusadisa bantu ya Nzambi. Ya ke mpenza samu na kusambila, mpe kutetika maboko na zulu ya bambevo ve, kasi samu bawu meka na kumona Yesu Klisto na kati ya beto, Mwana ya Nzambi na kati ya beto. Na nkokila yayi beto ke tubila dilongi yayi: *Na Yawu Yesu Kwisaka Mpe Bokilaka.*

<sup>4</sup> Ntangu yayi beto ke na kutubila, ya vwandaka ntangu mosi ya mpasi mingi. Kana beno me tangaka ntete ve disolo ya luzingu ya Mfumu ya beto, beto ke mona ti Yandi vwandaka Nkundi ya nene ya mwana-bakala yayi, Lazare. Yandi vwandaka . . . Na manima ya lufwa ya Joseph, to, Yandi katukaka mpe kwendaka zinga na Marthe, Marie, na Lazare. Mpe bawu vwandaka bankundi ya nene. Bawu vwandaka . . . Yandi vwandaka mutindu pasteur samu na bawu, Nkundi ya kieleka. Mpe bawu sadilaka Yandi mwa bilele ya kulwata, kazaka mosi samu na kulwata, mu banza, mutindu ba ke tubaka, mpe ya tungamaka kukondwa nzila yina ke vukisaka bitende zole ya lele. Na yina bawu sadilaka Yandi bima, samu bawu kwikilaka na Yandi. Ya vwandaka bawu—bawu yina kwikilaka mpe monaka yawu. Bawu bikaka dibuundu, mpe nionso yina, samu na kulanda Yandi. Mpe yina vwandaka kima ya nene na kilumbu yina, kitumbu ya yawu lendaka vwanda lufwa, ku—kubasika na yawu.

<sup>5</sup> Kasi, Yesu, Muntu yayi vwandaka kwenda sika na sika mutindu ba vwandaka tuba, samu na kupanza mabuundu ya bawu, kutuba mambu ya yimbi samu na banganga-Nzambi ya bawu, mpe—mpe nionso yina, bawu banzaka ti, Yandi—Yandi pesaka bawu mpasi mingi. Mpe—mpe kundima Yandi ba lendaka ata mpe ku—kubasisa nge na ba-synagogue. Na yina kana ba me basisa nge na dibuundu, bawu—bawu banzaka ti nge vwandaka diaka ve—ve na siansi ya mpulusu. Kana nge ke mundimi ya mosi ya binzambi-nzambi ya bawu ve, mumbandu Pharisien, Sadducéen, to kima mosi, mpulusu vwandaka ve kana nge vwandaka na nganda ya yawu. Mpe kana bawu vwandaka na muswa, bafungula, mpe ba lendaka basisa nge kana bawu me zola. Ya vwandaka nzonzolo ya bawu. Kuyituka ve Yesu tubaka, “Beno, na nzila ya binkulu ya beno, beno me sala ti Ndinga ya Nzambi kukuma mpamba.” Beno me mona?

<sup>6</sup> Mpe ntangu yayi ya me tubama diaka, samu beto nionso kuzaba mambu ya ntama ke vutukaka samu na kusalama mbala na mbala. Mpe ya—ya ke mawa na kutuba yawu, kasi ya pesamaka na profesi ti ya ke salama diaka, mpe ya me sala yawu diaka.

Beto me mona ti bantu vwandaka sepela na Yesu ve.

<sup>7</sup> Na bambala mingi, bantu ke zolaka kuzenga mambu ya bantu yina ke wisana na bawu ve. Beto fwana sala mutindu yina ve. Beto lenda wisana ve mosi na yankaka, kasi na kuvwandaka

na lutondo. Kana mu lenda wisana ve na muntu mosi, mpe kulandila kaka na kuzola yandi mpe kusambila samu na yandi, mpe kukondwa kuwisana na yandi na- . . . na yandi na zulu ya Masonuku, mpe samu na lubakusu ya kulutula mbote, na yawu mu ke tuba na yandi kima mosi ve. Mu ke zola ntangu nionso na kukondwa kuwisana na yandi, na lutondo, samu mu zola yandi, mpe ya kieleka mu—mu zola ve ti yandi zimbana. Mpe yandi fwanaka sala mutindu mosi na munu; beto zola zimbana ve. Mpe beto fwana tula mabanza ya beto na zulu ya yina Ndinga me tuba. Bika ti Ndinga kuvwanda ya kieleka. Ba-credo to mabanza ya beto ve, kasi yina Yandi me tuba; ntendulu ya muntu mosi ve, kaka yina Ndinga me tuba.

<sup>8</sup> Na nkokila yankaka, mu salaka kima mosi mpe ya monanaka mwa mafingu fioti, mu banza ti ya vwandaka na madia ya suka na lukutakanu ya balongi na suka yina. Mu lutisaka Yesu na lusambusu. Mu tubaka, “Kaka mutindu bawu salaka na ntangu yina, mutindu mosi ba ke na kusala bubu yayi.” Mu banza ti ya ke vwanda mbote kana mu vutukila yawu na mwa ntangu fioti, kana beto ke na ntangu. Ntangu yayi, mu tubaka, bubu yayi beto me mona ti . . .

<sup>9</sup> Na kusungika ya Luther, yandi, na ntangu yina, yandi tubaka ti muntu ya mbote ke zinga na lukwikilu. “Muntu yina ke kwikila, yandi, ya ke na Yawu.” Kasi beto me mona ti bantu mingi tubaka ti bawu me kwikilaka, kasi bawu ke na Yawu ve.

<sup>10</sup> Na bilumbu ya—ya John Wesley, kana bawu kuzwaka lusakumunu ya zole, mutindu ba bokilaka yawu, kusantisama, kusantisama ya muvimba, bawu sepelaka mingi mpe bawu bokaka. “Bayina nionso bokaka, bawu vwandaka na Yawu.” Kasi ba monaka ti bawu vwandaka na Yawu ve. Mingi na kati ya bawu bokaka, kasi bawu vwandaka na Yawu ve.

<sup>11</sup> Na bilumbu ya ba-Pentecotiste, bawu tubaka, “Ntangu yayi kuvutuka ya makabu me kwisa, mbotika ya Mpeve. Yina me tuba na bandinga ya malu-malu, yandi me kuzwa Yawu.” Beto me mona ti bantu mingi me tuba na bandinga ya malu-malu, kasi bawu me kuzwa Yawu ve.

<sup>12</sup> Na yawu bawu tubaka, “Mbote, mbuma ya Mpeve, tala Yawu yina.” Oh, ve, ya ke mbuma ya Mpeve ve. Science Chrétienne ke na yawu, na mutindu ti . . . Zola kele mbuma ya Mpeve. Na yawu, mpe ba ke na zola mingi kulutula bantu nionso, mpe bawu ke manga Bunzambi ya Yesu Klisto; ba ke tubaka ti Yandi kele kaka profete, kaka mutindu mosi na bantu nionso. Beno me mona? Na yawu ya ke sala kima mosi ve.

<sup>13</sup> Beno bika mu yufula ntete kiuvu mosi na mwa ntangu fioti. Beto lutisa Yesu na lusambusu. Mpe Nzambi kulemvokila munu samu na bandinga yayi, na kisika yayi ya malongi, kasi mu ke telemina Yandi na mwa ntangu fioti, samu na kunata beno kaka na Nsemo. Beno me mona?

14 “Ntangu yayi beno yayi awa na ntuala ya munu na nkokila yayi; mu ke na kutuba na beno. Munu . . .” (Mu vwandaka na kilumbu yina, ntangu Yesu ya Nazareth vwandaka na zulu ya ntoto.) “Mu me kwisa na ntuala ya beno, samu na kutelemina kintwadi na beno muntu yayi, Yesu ya Nazareth. Ntangu yayi beto nionso kuzaba ti Nzambi kele zola. Biblia me tuba ti Yandi ke mutindu yina. Mbote mingi, mpe zola, Mpeve kele ntima ya yinda, lutondo, mvibudulu, mawete, mpe nionso yina, mpe zola. Ntangu yayi mu ke tuba, mu zola yufula beno kima mosi. Beto ke baka mumbandu yina—yina beto zaba, Muklisto mosi.

15 “Beni tala kiboba ya nganga-Nzambi ya beno. Nkooko ya nkooko ya nkooko ya nkooko ya yandi vwandaka nganga-Nzambi. Ya fwanaka butuka na dikanda ya ba-Levite, samu na kuvwanda nganga-Nzambi. Beto me mona ti, ntangu yayi, luzingu ya yandi ya kileki vwandaka ve mutindu mosi na beno. Yinki yandi salaka? Yandi me kukipesa yandi mosi, yandi me vwanda kuna na zulu samu na kulunguka Ndinga, Ndinga ya Nzambi. Yandi vwandaka longuka yawu, na mwini mpe na mpimpa, na mwini mpe na mpimpa, samu na kuzaba mukanda ya yawu, samu na kuzaba konso mpova yina kele na kati ya buku. Yandi fwanaka zaba yawu na ntima. Yandi—yandi, ya lombaka ti ya zaba mambu yayi.

16 “Mpe na yawu, na nganda ya yina, ntangu tata mpe mama ya yandi kwelanaka, nani vukisaka bawu kintwadi mutindu kento na bakala? Kiboba ya nganga-Nzambi ya beno ya santu. Nani kwisaka mona tata ya beno na ntangu yandi vwandaka na nsatu mpe lendaka futa mbongo samu na ferme ya yandi, na ntangu midèfisi zolaka kanga yandi? Nani sadisaka yandi? Kiboba ya nganga-Nzambi ya beno ya lutondo. Nani sadisaka mama ya beno na kati ya yinzo yina kuna na ntangu yandi vwandaka kubuta beno? Kiboba ya nganga-Nzambi ya lutondo. Nani ke kwisaka tala beno ntangu beno kele mbevo mpe na nsatu? Kiboba ya nganga-Nzambi ya beno ya lutondo. Nani sakumunaka beno mpe pesaka beno na Nzambi, mpe salaka beno nzengolo ya kibakala na kilumbu ya nana? Kiboba ya nganga-Nzambi ya beno ya lutondo. Ntangu tata mpe mama ya beno zolaka kufwa makwela, nani vukisaka bawu diaka, mpe tulaka bawu kintwadi? Kiboba ya nganga-Nzambi ya beno ya lutondo. Ntangu diambu kele na quartier, nani ke talaka diambu yango? Kiboba ya nganga-Nzambi ya beno ya lutondo. Ya kieleka.

17 “Ntangu yayi kiboba yayi ya nganga-Nzambi ya lutondo kuzaba ti Biblia me tuba ti Nzambi ke lombaka mwana-dimeme mutindu munkayulu. Mingi na kati ya beno kele bantu ya mumbongo, na yawu beno ke sansaka mameme ve, kasi Nzambi ke lombaka dimeme. Bawu salaka mwa mapangu kuna, bawu tekisaka mameme ya bawu na mutindu ti bantu ya mumbongo lendaka kwenda kuna samu na kusumba yawu, samu na kupesa munkayulu ya mioyo ya bawu, yina Nzambi ke lombaka.

18 “Mwana-bakala yayi ba ke bokila Yesu, yinki ya salaka? Wapi yandi katukaka? Yandi tubaka ti ya butukaka, lubutuku ya bumwense. Nani me waka ntete buzoba ya mutindu yayi? Beto zaba ti mama ya yandi kuzwaka kivumu ya yandi na ntwala yandi na Joseph kubutuka, to, yandi na Joseph kukwelana, yandi butukaka. Ntangu yayi beto me mona ti yandi ke na—yandi ke na lukumu ya yimbi, na kubanda.

19 “Yinki kalati ya ba-membre ya ke na yawu? Kana ya vwandaka muntu ya santu, yinki kimvuka yandi ke vwandaka? Ntangu nganga-Nzambi ya beno longukaka, longukaka, longukaka, longukaka, samu na kuzaba Ndinga yayi; yandi yina me kwisa, mpe ke bebisa yina yandi tungaka. Beno lenda bokila yawu ‘Nzambi’? Ata fioti ve.

20 “Ntangu yayi, kilumbu yankaka, ntangu nganga-Nzambi ya beno yidikaka kisika yina kuna, . . .kisika beno lendaka sumba munkayulu, yinki mwana-bakala yayi salaka? Yayi lutondo? Yandi bulaka, ya tungaka bansinga, ya lino mpe ya cuire, mpe yandi talaka bantu, na makasi; ya balulaka bamesa, mpe basisaka bawu na fimbu. Mpe beno ke bokila yina bambuma ya Mpeve, kutala bantu, na makasi? Mpe, beno tala, ya me buyila muntu ntangu ya mbote ya kusambila Yehowah! Muntu ya mumbongo zola sambila Yandi; mutindu ya ke sansaka mameme ve, mpe yandi kwendaka kuna samu na kusumba yawu. Mpe Yandi losaka nionso yina, ya bulaka yawu dikulu, mpe basisaka bawu.”

21 Nani ke na mbuma ya Mpeve kuna? Um-hum. Beno me mona? Yawu yina. Beno me mona, mbuma ya Mpeve ve, kutuba na bandinga ya malu-malu ve, kuboka ve.

22 Beno ke tuba, “Na yawu, Mpangi Branham, yinki kele nzikisa? Yinki kele nzikisa?” Kusiamisama ya Ndinga na ngunga yango.

23 Bawu vwandaka na Biblia. Yandi vwandaka ya kieleka yina Yehowah tubaka ti ke salama. Ya vwandaka na nsatu ya ntendulu ve. Yawu tendusamaka na ntangu yina. Ya vwandaka na banganga-Nzambi, ba vwandaka na nionso, mpe nionso yankaka kaka na mutindu ya mumesanu mpe nionso yina, kasi bawu monaka Ndinga ve. Mpe Yandi salaka ti Ndinga kuzinga na nsungi yina. Yawu yina nzikisa samu na nsungi ya yango.

24 Luther vwandaka na nzikisa ya nsungi ya yandi, Wesley samu na nsungi ya yandi, Pentecote samu na nsungi ya yawu, kasi beto ke na nsungi yankaka. Bima yina kele mbote. Kasi mutindu bébé, yina ke na musapi, disu, na mbombo, kasi na manima ya mwa ntangu fioti ya ke kuma muntu. Yandi fwana kuma mwana ya kuyela; na manima kubutuka, kuvwanda na moyo, nzutu, mpeve, ya lenda tambula.

25 Ntangu yayi beto me mona ti, nionso yayi, Yesu tubaka yawu, mpe bantu fioti kaka, kaka bayina Yandi kanaka na Luzingu,

monaka Yandi. Nkonga ya bantu ve; nkonga ya bantu ya Yandi lendaka vwanda ata fioti ve mutindu mosi na nkonga ya bantu ya Caiṗhe. Na yina, Caiṗhe lendaka vukisa yinsi ya muvimba. Yesu vukisaka bantu fioti kaka. Bantu mingi zabaka Yandi ve. Yawu vwandaka na mafunda na mafunda ya bantu, ntangu Yandi kwisaka na zulu ya ntoto, Yandi lutaka na zulu ya ntoto, mpe bawu zabaka ata fioti ve ti Yandi vwandaka awa.

<sup>26</sup> Ya ke vwanda diaka mutindu yina! Yandi ke kwisa na bayina ba bokilaka na Luzingu. Yandi zaba yina ba me bokila na Luzingu. Mpe Yandi ke . . . Yandi mosi ke keba yawu.

<sup>27</sup> Ntangu yayi beto ke mona ti bawu basikaka na dibuundu, mpe bawu kwikilaka na Yandi. Nionso yina Ndinga tubaka samu na Yandi, Yandi vwandaka mutindu yina.

<sup>28</sup> Mpe kilumbu mosi Yandi bikaka yinzo ya bawu. Mu zola tubila bima tatu: Yesu kwendaka; lufwa kwisaka; mpe kivuvu vwandaka diaka ve. Mu zola tubila bima yayi tatu na mwa ntangu fioti.

<sup>29</sup> Yesu kwendaka. Mpe ntangu Yandi kwendaka, bampasi kwisaka. Ntangu yayi kana Yandi bika beno, to yinzo ya beno, bampasi ke na kukwisa. Kielo ke zibuka na Satana kana Yesu me kwenda.

<sup>30</sup> Yandi kwendaka, mpe—mpe kaka na ntangu Yandi kwendaka, lufwa kotaka. Mpe ntangu Yesu me kwenda, lufwa ke kota. Kukabwana na Yandi kele lufwa, na yawu lufwa ke kota na ntangu Yesu me kwenda.

<sup>31</sup> Mpe lufwa kuzwaka ntangu ya yawu na Lazare. Na yawu Yandi yina bawu kwikilaka mpe zolaka, ba kwendaka bokila Yandi na kukwisa sambila samu na Lazare, samu bawu monaka Yandi mpe bawu zabaka ti Yandi zabaka Nzambi, ti, “Nionso yina, Nzambi. . .” Marthe tubaka yawu, “Nionso yina Nge ke tuba na Nzambi na ntangu yayi, Nzambi ke sala yawu.” Yandi zabaka ti Yandi na Nzambi vwandaka Mosi. Yandi vwandaka Ndinga ya ngunga yango, na yina yandi zabaka yawu. Mpe yandi zabaka ti, kana yandi lendaka solula na Yandi, kasi Yandi vwandaka me kwenda mpe ba lendaka solula na Yandi ve na allo-allo. Mpe ba kwendaka bokila Yandi, mpe, na kisika Yandi kwisa, Yandi kwendaka ntama ya bawu. Na manima ba kwendaka bokila Yandi diaka, mpe, na kisika ya kukwisa, Yandi kwendaka ntama ya bawu.

<sup>32</sup> Mbala yankaka beto ke kukiyufulaka samu na yinki bima yayi ke salamaka, kasi Masonuku ke tubaka ve ti, “Mambu nionso ke salamaka samu na mambote ya bantu yina ke zolaka Nzambi”? Yandi zaba yina Yandi ke na kusala. Kana Yandi me wumelá, ya ke mbote mingi. Yandi zaba yina Yandi ke na kusala. Kikuma mosi kele.

<sup>33</sup> Beto ke mona yina Yandi tubaka, na Santu Jean 5:19, “Ya kieleka, ya kieleka, mu ke tuba na beno, Mwana lenda sala kima

mosi ve na Yandi mosi, kasi yina Yandi me mona Tata ke na kusala.”

<sup>34</sup> Tata tubaka na Yandi na kukwenda, mpe kuvwanda ntama bilumbu mingi. Na ntangu bilumbu yina kulungaka, na yawu Yandi tubaka yina Yandi tubaka na ntangu yina, ti, “Nkundi ya beto Lazare me lala.”

Mpe yandi tubaka, “Mbote, yandi me sala mbote.”

<sup>35</sup> Yandi tubaka, “Yandi me fwa. Mpe samu na beno Mu me sepela samu Mu vwandaka kuna ve.” Na yina, bawu vwandaka meka na kunata Yandi na yinzo ya yandi, samu na kubelusa yandi to samu na kutuba yina ba lendaka sala. Kasi Yandi zabaka yina ya lendaka sala, na yawu Yandi salaka kaka yina Yandi kanaka na kusala: kuvwanda ntama. Kana beno tala Yandi na ntoni ntangu Yandi vutukaka. Yandi tubaka yawu ntangu Yandi kwisaka vutuka mpe ya monaka yinzo yango.

<sup>36</sup> Kivuvu vwandaka diaka ve. Lazare kufwaka. Na konso ngunga, bawu vwandaka banza kaka, “Yandi lenda monana. Yandi lenda monana. Yandi lenda vutuka.” Na nsuka-nsuka, yandi fwaka, pema bikaka yandi.

<sup>37</sup> Na yawu bawu kwendaka, mpe ba yumisaka yandi, ba katulaka menga na nzutu ya yandi, ba zingaka yandi na lele mosi ya lino, na bamananasi, mpe ba kawusaka yandi mpe ba tulaka yandi na ntoni, ba tulaka ditadi na ntwala ya ntoni, mutindu vwandaka kinkulu ya kuzika bantu na bilumbu yina. Dibulu mosi na ntoto, mbala yankaka na kati ya ntoni, mpe ba vwandaka tula ditadi na ntwala ya yawu, yina vwandaka kinkulu ya bawu.

<sup>38</sup> Kilumbu ya ntete lutaka, kilumbu ya zole lutaka, kilumbu ya tatu lutaka, kilumbu ya yiya lutaka, muntu yango vwandaka me pola na kati ya ntoni. Mbombo ya yandi vwandaka me niefwama. Mu banza ti, kima ya ntete ke niefwamaka, kele mbombo. Mpe ya vwandaka me pola dezia. Nsuni ya yandi—ya yandi vwandaka me vutuka na putulu, ya ntoto, to yawu vutukaka. Moyo ya yandi salaka nzietelo ya bilumbu yiya kisika mosi kuna, ntama na yandi.

<sup>39</sup> Kivuvu ya kumona yandi diaka, na luzingu yayi, vwandaka diaka ve. Mpe na yawu ntangu kivuvu nionso vwandaka diaka ve. . . Bawu vingilaka, “Mbala yankaka Yandi lenda kwisa na kilumbu ya ntete, na kilumbu ya zole!” Ve. Na yawu yandi fwaka, mpe Yandi kwisaka ve. Na yawu ntima kusukaka.

<sup>40</sup> Na manima ya mwa ntangu fioti muntu mosi fwanaka tuba na yandi, “Mulongi kele na nganda.” Marthe yandi yina ke kulumuka na nzila!

<sup>41</sup> Yesu kwisaka na ngunga ya mudidi ntangu kivuvu nionso vwandaka diaka ve. Mbala mingi Yandi ke kwisaka na ntangu

yina. Beno me mona? Yandi ke kwisaka kaka na ntangu yina ya mudidi, ya ke na ntangu yina Yesu ke monana.

<sup>42</sup> Beno tala ntangu yayi, Yandi kwisaka mpe bokilaka Marthe. Mvwandulu ya Yandi ke nataka kivuvu ya malu-malu. Ata ti mwana-bakala vwandaka me kufwa, Mvwandulu ya Yandi nataka kivuvu ya malu-malu.

<sup>43</sup> Nge lenda vwanda awa na nkokila yayi, nkundi ya munu, na ntangu badokotolo me bika nge, na cancer, mpassi ya ntima. Mbala yankaka na kiti mosi, kikata, bantu ya mayele nionso me tuba ti kivuvu kele diaka ve samu na nge; depo ya calcium me—me kanga mikwa ya nge—ya nge—ya nge, na mutindu ti nge lenda tandula yawu diaka ve. To, mbala yankaka ntima ya nge—ya nge kele mbote ve, na mutindu ti badokotolo me tuba ti nge lenda kwenda na konso ntangu yina. Oh, mpe nkonga ya bantu mingi ke na cancer na tuberculose, mbala yankaka kivuvu ya nsuka beno ke na yawu, mpe ya me monana ti dokotolo me bika nge. Kasi, kuvwanda na Mvwandulu ya Yesu Klisto mpe kuzaba Mvwandulu yango, ke nataka diaka kivuvu.

<sup>44</sup> Muntu mosi lenda ata kupesa nge nkumbu mosi. Mbala yankaka nge me waka ntete ata fioti ve, ata ti muntu mosi kutuba na nge, “Mu zaba kisika yinzo-Nzambi mosi kele, kisika ba ke kwikilaka na Nzambi mpe ba ke sambilaka samu na bambevo,” na nswalu nionso (Ntangu yayi, nge zola kufwa. Beno me mona?), kivuvu ya malu-malu me kwisa. Ya ke vwandaka kaka mutindu yina. Na ngunga yina ya mudidi, mbala mingi na ntangu yina muntu mosi ke tubila beno yawu, ti ba ke tuba na beno samu na Yesu. Mvwandulu ya Yandi nataka kivuvu ya malu-malu.

<sup>45</sup> Bika yawu sala mutindu mosi na nkokila yayi, mutindu yawu salaka mazono na nkokila. Ntangu beto me mona Ndinga yina me siamisama kukondwa ntembe, beto me mona yawu me monisama, mpe me ndimisama ti *yayi* ke Yesu yina zingaka bamvula nkama yivwa me luta, yina fwaka na zulu ya Calvaire, yina vumbukaka na lufwa na kilumbu ya tatu, mpe yina monikaka na bantumwa yina mpe zibulaka meso ya bawu, mpe pesaka nsilulu ya kilumbu yayi, ya kele awa na nkokila yayi na ntuala ya beto na ntangu yayi, ya ke sala kima yankaka ve kasi kunata kivuvu ya malu-malu na bantu. Kivuvu ya malu-malu ke basika.

<sup>46</sup> Mbala yankaka muntu mosi me tuba, “Dibuundu yumaka fioti na mwa ntangu fioti. Beto ke vwandaka diaka ve na masa ya mbote ya madidi na—na—na mwa bangonda me luta. Beto ke vwandaka diaka ve na reveil. Ya me monana ti bantu nionso me yuma, to kima mosi ya yankaka. Beto ke kwendaka kaka na yinzo-Nzambi samu na kuyimbila mwa mukunga mosi, mpe—mpe samu na kuwa mwa bansangu mpe na manima beto ke vutuka.” Kasi na mbala mosi, na yina, ntangu beto me banda na kuyuma, kele na ntangu yina Yesu ke kwisa, ya ke pesa beto



madidi, ya ke natila beto kima ya malu-malu. Yandi kele ntangu nionso kuna samu na kusala yawu. Kivuvu ya malu-malu ke kwisa ntangu—ntangu Yesu ke kota. Mvwandulu ya Yandi ke nataka kivuvu ya malu-malu.

<sup>47</sup> Yandi zabaka ti Yandi vwandaka Ndinga ya Nzambi yina me monisama. Yandi monaka nsungi yina. To, kana ve, ya lendaka bikala Orthodoxe. Ya lendaka bikala mundimi ya dibuundu. Kasi yandi monaka Ndinga yina ya nsilulu. Yandi monaka Ndinga yina ya nsilulu yina monisamaka na nzila ya Yandi mpe yandi zabaka ti Yandi vwandaka Ndinga yina ya moyo. Mpe ntangu yandi waka yawu, yandi kipaka ve bantu yina vwandaka sawula yandi, to nionso yankaka, yandi kwendaka kutana na Yandi na nswalu nionso. Beno me mona? Yandi zabaka ti Yandi vwandaka Ndinga yina me monisama.

<sup>48</sup> Na ntembe ve ti yandi tangaka disolo ya Elie na bilumbu ya yandi. Ntangu yayi, yandi vwandaka Ndinga ya Nzambi yina me monisama na kilumbu yina. Yandi vwandaka profete, mpe Ndinga ya Mfumu ke kwisaka na profete. Mpe ya vwandaka na kento mosi kuna yina kuzwaka bébé mosi na nzila ya lusakumunu yina profete yayi sakumunaka yandi, mpe yandi kuzwaka mwana yango.

<sup>49</sup> Kilumbu mosi, pene ya ngunga kumi na mosi, mwini bulaka yandi ngolo mingi. Yandi vwandaka kuna na kati ya kilanga na tata ya yandi, Biblia me tuba mutindu yina ve, ti ntangu bulaka yandi ngolo, kasi yandi bandaka na kuboka, “Yintu ya munu! Yintu ya munu!” pene ya ngunga kumi na mosi ya suka. Mpe yandi tubaka, tata tubaka na kisadi, na kunata yandi na yinzo. Yandi tulaka yandi mabolongo ya mama ya yandi tii pene ya midi, kimbevo kumaka ngolo mpe ngolo diaka, mpe nsuka-nsuka yandi fwaka.

<sup>50</sup> Mpe ntangu yayi, na kisika kivuvu kumana, . . . bankalani nionso bandaka na kudila mpe nionso yina, kasi mama yina ya kikesa, bébé ya yandi kufwaka, yandi matisaka yandi na mwa chambre yina yandi yidikaka samu na profete, mpe yandi tulaka yandi na zulu ya mbeto ya yandi, mutindu *yayi*. Mpe yandi tubaka na kisadi, “Yidikila munu mpunda, mpe kwenda na ntwala, mpe kutelema ve kana mu me tuba na nge ve.” Oh, la la! Yawu yina!

<sup>51</sup> Beto ke na ntangu ya kubendana mpe kuswana ve. Ntangu yina me lutaka. Beto kwenda na ntwala. Ya ke lomba ti beto kuma kuna. Beto ke na nsatu.

<sup>52</sup> Mpe na yawu yandi tubaka, “Kwenda na ntwala, mpe kulembisa mbangu ya nge ve kana mu me tuba na nge ve.” Mpe bawu kwendaka tii kuna bawu kumaka na kisika ya Elie.

<sup>53</sup> Elie, mutindu muntu ya Nzambi, mutindu Klisto ve; Klisto zabaka mambu nionso, samu Yandi vwandaka Nzambi. Elie vwandaka kitini ya Nzambi. Yina vwandaka Klisto na kati ya

Elie. Mpe yina vwandaka nsangu ya ntangu, samu Ndinga ya Mfumu na ntangu yina vwandaka na profete yina.

<sup>54</sup> Yesu vwandaka muvimba ya baprofete yina nionso, bawu nionso vwandaka talisa Yandi kaka. Yimeni. Bawu nionso kubanda na Joseph, kubanda na palata makumi tatu ya mbongo, bisika nionso, yandi—yandi vwandaka talisa Klisto. Mutindu mosi na Moise!

<sup>55</sup> David, vwandaka na zulu ya mongo mutindu profete yina ba me manga, ya vwandaka dila samu bawu mangaka yandi. Bamvula nkama nana na manima ya yina, Mwana ya David vwandaka na zulu ya mongo. Yina vwandaka Mpeve ya Klisto na kati ya David kuna. Mpe Yandi. . . Oh, lala! Yandi vwandaka Nsimbulu mpe Dikanda ya David. Mpe na yawu Yandi vwandaka na zulu ya mongo, ke dila, mutindu Ntinu yina ba me manga, “Jerusalem, Jerusalem, mbala yikwa mu zolaka bumba nge, mutindu nsusu ya kento ke bumbaka bana ya yandi.” yinki ya vwandaka? Ya vwandaka Klisto kuna.

<sup>56</sup> Ya vwandaka Klisto yina vwandaka boka ntangu David sonikaka mukunga yayi, “Nzambi ya Munu, samu na yinki Nge me bika Munu? Mikwa ya Munu nionso, ba ke na kutala Munu. Ba me tobula makulu ya Munu na maboko ya Munu. Ba me kabula bilele ya Munu na kati ya bawu. Ba me bula zeke na kazaka ya Munu.” Yina vwandaka Klisto ke na kutuba na kati ya David. Ya kieleka. Yandi vwandaka kumonisama ya Ndinga. Klisto kwisaka samu na kulungisa mambu yina baprofete kutubaka, samu Ndinga vwandaka na baprofete.

<sup>57</sup> Yandi tubaka yawu na dilongi ya mazono na nkokila, ti Yandi kwisaka samu na kulungisa yina baprofete tubaka samu na Yandi, samu bawu vwandaka na Ndinga. Mpe Elie vwandaka profete ya Nzambi, Ndinga ya ntangu yina.

<sup>58</sup> Na yawu kento ya Sunamite yina vwandaka na profete tii kuna yandi kwisaka monisa ngolo ya Nzambi, mpe ya lalaka na zulu ya bébé yango, mpe bébé vutukaka na luzingu.

<sup>59</sup> Ntangu yayi Marthe fwanaka zaba yawu, ata ti ya vwandaka na kisalu mingi ya kutala mambu ya yinzo, mpe nionso yina. Kasi kuna yandi talisaka yina vwandaka yandi vwandaka. Yandi talisaka mpenza yina vwandaka na kati ya yandi. Yandi kwendaka mbala mosi samu na kusosa Yandi. Kana Nzambi vwandaka na kati ya Elie, Nzambi fwana wanda na kati ya Klisto, samu Yandi siamisaka ti Yandi vwandaka Muntu yango. Amen. Mu ke zolaka yawu, lukanu ya mutindu yina! Yandi kwendaka kutana na Yandi. Ya lombaka ti yandi kuma kisika Yandi vwandaka. Mpe kuna yandi monaka ti, ntangu yandi kumaka kisika Yandi—Yandi vwandaka; beno bambuka ntangu yayi, ya zabaka ti Yandi sobaka ata fioti ve, ti Nzambi ke sobaka manaka ya Yandi ata fioti ve. Kana Yandi vwandaka na kati ya Elie mpe lendaka vumbula bafwa, Yandi vwandaka na kati ya

Klisto mpe lendaka vumbula bafwa, ata ti Yandi salaka yawu ntete ve, samu ya ke Nzambi mosi kaka.

<sup>60</sup> Ya me sobaka ata fioti ve! Ya ke kaka Nzambi mosi yina na nkokila yayi mutindu Yandi vwandaka ntete. Yandi ke mutindu mosi mazono, bubu yayi, mpe kukondwa nsuka. Yandi ke sobaka.

<sup>61</sup> Mpe Yandi zabaka ti ya zabaka yina yawu vwandaka na kati ya Yandi. Beno tala, kaka na mwa ntangu fioti yawu siamisamaka, ntangu yandi tubaka na Yandi kima mosi samu na mpangi ya yandi ya bakala, mpe yandi tubaka, “Mfumumu, mu—mu me kwikila ti yawu kele Nge.”

<sup>62</sup> Mpe Yandi tubaka, “Mu ke Mvumbukulu mpe Luzingu. Ata ti yandi me kufwa, kasi yandi ke zinga. Mpe muntu nionso ke na kuzinga mpe me kwikila na Munu yandi ke fwa ata fioti ve. MUNU KELE.” Ya ke MUNU KELE yina vwandaka na kati ya mulaka ya tiya, na Moise. “Mu ke Mvumbukulu. Mu ke Luzingu. Mu vwandaka Kibaka. Mu ke kaka Yandi. Mu ke Mvumbukulu mpe Luzingu. Yandi yina ke kwikila na Munu, ata ti yandi me kufwa, kasi yandi ke zinga. Muntu yina ke na kuzinga mpe me kwikila na Munu, ke fwa ata fioti ve.” Na manima ya kundimisama yayi ya nene yina yandi vwandaka na yawu, ti Yandi vwandaka Ndinga ya nsilulu; ntangu Yandi tubaka, mutindu Profete, Yandi lendaka tuba luvunu ve; na yina Yandi, ntangu Yandi tubaka, “Munu kele YINA KELE. Mu ke Yandi yina kele Mvumbukulu mpe Luzingu.”

<sup>63</sup> Yandi tubaka, “Mu me kwikila ti Nge kele Yandi, Mwana ya Nzambi yina ke kwisa na yinza. Ata ti mpangi ya munu ya bakala me kufwa, yandi me tandama kuna na kati ya ntoni, yandi ke . . . nzutu ya yandi ke na kupola na ntangu yayi; kasi ata mpe na ntangu yayi, nionso yina Nge ke tuba, yawu ke salama.” Ya kieleka!

<sup>64</sup> Nionso ya vwandaka na yawu nsatu vwandaka kuwa Yandi kutuba mutindu yina! Amen. Oh, Marthe, wapi beto kele na nkokila yayi? “Tuba kaka Ndinga; mpe kisadi ya munu ke zinga!” Kuwa Yandi kaka kutuba mutindu yina! Bantu kwisaka tuba na yandi mbala yankaka ti Yandi me tuba yawu, kasi Yandi vwandaka kuna Yandi mosi. O Nzambi, zibula meso ya bampofo, ti bawu lenda vwanda na kiyeka ya kumona! Ntangu Yandi, na Mvwandulu ya Yandi, me tuba Ndinga, ya ke monisamaka ntangu nionso.

<sup>65</sup> Yandi tubaka, “Nionso yina Nge ke lomba na Nzambi, Nzambi ke pesa yawu na Nge. Mu zola kuwa yawu kaka!” Yandi zolaka ti Yandi tuba Ndinga. Yawu yina kaka yandi zolaka kuwa. Kaka kubaka Ndinga, yawu yina yandi vwandaka na yawu nsatu, ya vwandaka ti Yandi kuwa Yandi kutuba ti Yandi ke sala yawu.

66 Mpe Yandi lendaka sala yawu na mbala mosi, kasi, beno me mona, na vision yina Tata talisaka Yandi, ya lombaka ti Yandi telema pene-pene ya ntoni. Oh, la la! Simba lukwikilu ya nge! Nzambi ke na kusala kosalu samu mambu nionso kutambula mbote. Mambu nionso ke tambula mbote. Beno vingila kaka yandi kuma na ntoni.

67 Beno tala, yandi lendaka sala ti Yandi kutuba yawu, ata mpe ntangu yandi vwandaka ntete. . . Kivuvu nionso vwandaka diaka ve, ata mosi ve. Yandi fwaka, yandi bandaka na kupola na kati ya ntoni, kasi kuwa Yandi kaka kutuba mutindu yina, yawu yina nionso yandi zolaka.

68 Ntangu yayi na ntangu Yandi tubaka, “Mu ke Mvumbukulu mpe Luzingu,” yandi kwikilaka yawu. Yandi kwikilaka yawu. Beno tala ntangu yayi, ntangu yayi ya lombaka ti yandi kwikila na mambu yina ke salamaka ve, ntangu yandi waka Yandi kutuba, “Mu ke Mvumbukulu mpe Luzingu. Ata ti yandi me fwa, kasi yandi ke zinga, mpe muntu yina ke na kuzinga mpe me kwikila na Munu yandi ke fwa ata fioti ve.” Yandi tubaka, “Nge me kwikila yawu?”

69 Mpe yandi tubaka, “Yinga, Mfumu, mu me kwikila yawu. Mu me kwikila ti Nge ke Mwana ya Nzambi yina ke kwisa na yinza.” Mu ke zolaka yawu. Mu ke zolaka yawu.

70 Mu—mu me tubaka ntete mambu yayi. Ya lenda vwanda diaka mbote na ntangu yayi. Mu vwandaka solula na kento mosi ntama mingi ve, ya vwandaka dibuundu mosi mu me tanga nkumbu na mwa ntangu fioti me luta, yina ke kwikilaka ve ti Yandi vwandaka Nzambi, Bunzambi ya Yandi; Yandi vwandaka kaka profete, muntu mutindu bantu nionso.

71 Yandi vwandaka yawu, ya kieleka. Yandi vwandaka yawu, mpe Nzambi. Beno me mona, Yandi vwandaka kumonisama. Yesu kele nzutu, Mwana-bakala, Muntu; ya vwandaka Nzambi yina vwandaka zinga na kati ya Yandi. Nzambi vwandaka na kati ya Yandi. Yandi vwandaka Nzambi-muntu. Yandi vwandaka Muntu, kasi Yandi vwandaka Nzambi yina me monisama na nzutu. Ntangu beto me mona Yesu, beto me mona Nzambi. Yawu yina Yandi tubaka, “Ntangu beno me mona Tata. . . beno me mona Munu, beno me mona Tata.” Samu, Yandi vwandaka kutalisama, samu Yandi vwandaka Ndinga, amen, yina vwandaka na mbatukulu. Amen.

72 Yandi bokilaka baprofete, “nzambi.” Beno zaba yawu? Yandi tubaka, “Beno ke bokilaka bawu ‘nzambi’ bayina Ndinga ya Nzambi ke kwisaka na bawu. Samu na yinki beno lenda bedisa Munu ntangu Mu me tuba, ‘Munu kele Mwana ya Nzambi?’”

73 Samu, Ndinga yango tubaka ti Yandi ke vwanda kuna, mpe tala diaka Ndinga yina me monisama. Mpe kasi bawu lendaka kwikila yawu ve.

74 Kento yayi tubaka na munu, “Mu lenda talisa yawu na nge.” Yandi tubaka, “Mu ke zolaka kuwa nge kulonga, kasi kima mosi kaka nge ke salaka mingi.”

“Mbote, yinki diambu?”

Yandi tubaka, “Nge ke kumisaka mingi Yesu.”

75 Mu tubaka, “Mu banza ti diambu yawu yina kaka Yandi ke telemina ntangu Yandi ke kwisa.” Mpe yandi tubaka. . . Mu tubaka, “Mu banza ti yawu yina kaka Yandi lenda, kifu yina kaka Yandi lenda mona na munu.” Mu tubaka, “Ata ti mu vwandaka na bandinga mafunda kumi, mu lendaka tuba mingi ve, oh, la la, yina Yandi kele!”

Yandi tubaka, “Kasi, nge, nge ke sala Yandi Nzambi.”

76 Mu tubaka, “Yawu yina Yandi vwandaka. To, kana Yandi vwandaka mutindu yina ve, Yandi vwandaka muntu ya kulutila luvunu yina yinza me kuzwaka ntete ve.”

Yandi tubaka, “Yandi vwandaka profete.”

77 Mu tubaka, “Yandi vwandaka Profete, ya kieleka: Nzambi-profete, muvimba ya Ndinga. Profete vwandaka na Ndinga yina kwisaka na yandi, yawu yina me sala yandi—salaka yandi profete. Kasi Yandi vwandaka muvimba ya Ndinga.”

78 Mpe yandi tubaka, “Mu lenda talisa yawu na nge.” Yandi tubaka, “Nge ke salaka Yandi Nzambi.”

Mu tubaka, “Yandi vwandaka Nzambi.”

Mpe yandi tubaka, “Yandi lendaka vwanda Nzambi ve.”

Mu tubaka, “Yandi. . . Kasi yawu yina Yandi vwandaka.”

Yandi tubaka, “Nge ke tubaka ti nge ke kwikilaka Biblia.”

Mu tubaka, “Mu ke kwikilaka yawu.”

79 Yandi tubaka, “Mu ke talisa yawu na nge, na nzila ya Biblia ya nge mosi, ti Yandi vwandaka Nzambi ve.”

80 Mu tubaka, “Sala yawu. Kana Biblia me tuba mutindu yina, na yina mu ke kwikilaka yawu, samu mu ke kwikilaka ti Ndinga kele ya kusungama.”

81 Yandi tubaka, “Na ntangu ya vwandaka kwenda na ntoni ya Lazare, nge ke bambuka yawu na Santu Jean 11?”

Mu tubaka, “Ya kieleka, mama.”

82 Yandi tubaka, “Mbote, ntangu yayi, ntangu ya vwandaka kwenda kuna, Yandi dilaka. Biblia me tuba, ‘Yandi dilaka.’”

Mu tubaka, “Ya kieleka, Biblia me tuba ti Yandi dilaka.”

Yandi tubaka, “Yinki mutindu Yandi lendaka vwanda Nzambi mpe kudila?”

Mu tubaka, “Yandi vwandaka muntu.”

“Muntu mpe Nzambi?”

<sup>83</sup> Mu tubaka, “Yinga, mama. Nge me kondwa na kumona. Yandi vwandaka muntu na ntangu ya vwandaka kwenda kuna, kudila na bayina vwandaka kudila, ya kieleka, kuwa mawa na bayina vwandaka na mawa. Yandi vwandaka muntu. Kasi ntangu Yandi sungikaka mwa nzutu ya Yandi, ya fioti, mpe tubaka, ‘Lazare, basika,’ mpe muntu yina kufwaka na bilumbu yiya me luta, yandi telemaka diaka. Yina lendaka vwanza kulutula muntu, yina vwandaka Nzambi na kati ya Muntu.” Nani lenda vumbula bafwa, kana Nzambi ve? Yandi ke Mvumbukulu mpe Luzingu! Ya kieleka.

<sup>84</sup> Na mpimpa yina na nzadi, ntangu Yandi vwandaka kuna, ya lembaka, ya lalaka na manima ya masuwa, kisika bampeve ya yimbi mafunda kumi bakaka lukanu ya kuzindisa Yandi na masa na mpimpa yina, mpe mwa masuwa yango vwandaka tepa-tepa kuna mutindu kifiniki ya mulangi na zulu ya kitembo ya nzadi. Bampeve ya yimbi yango banzaka ti, “Beto me kuzwa Yandi ntangu yayi. Yandi me lala; beto ke zindisa bawu nionso.” Oh, Yandi vwandaka muntu, ya kulemba, kasi ntangu ya telemaka mbala mosi, Yandi tulaka dikulu na dibaya ya masuwa, mpe ya talaka na zulu mpe tubaka, “Pima, vwanza swi,” mpe mupepe mpe kitembo tumamaka na Yandi. Yina vwandaka kulutula muntu.

<sup>85</sup> Yandi vwandaka muntu ntangu Yandi vwandaka na nzala, ntangu ya kulumukaka na mongo, ya vwandaka sosa kitini ya dimpa to kima ya kudia, to figi na yinti. Kasi ntangu Yandi bakaka mwa mampa tanu na bambisi zole, mpe disaka bantu mafunda tanu, yina vwandaka Nzambi na kati ya Muntu. Ya kieleka.

<sup>86</sup> Oh, muntu nionso yina salaka luzingu ya yandi kima ya mpamba vwandaka kwikila yawu, bayimbi nionso yina vwandaka kwikila yawu. Kuyituka ve muyimbi mosi sonikaka:

Na luzingu Yandi zolaka munu; mpe na lufwa,  
Yandi vulusaka munu;  
Na kuzikama, Yandi nataka ntama masumu ya munu;  
Na mvumbukulu, Yandi nungisaka munu kimakulu ya ofele;  
Kilumbu mosi Yandi ke kwisa, O kilumbu ya nkembo!

<sup>87</sup> Eddie Perronet, yina mikunga ya yandi vwandaka tekama ve. Kilumbu mosi, ntangu ya vwandaka tekita na nsi ya ngolo ya Mpeve-Santu, yandi bakaka kilapi, yandi sonikaka mukunga ya kukotila, ntangu yandi sonikaka:

Bantu nionso kukumisa ngolo ya Nkumbu ya Yesu!  
Bika ti Bawanzio kufukimina Yandi;

Beno kwisa na yimpu ya kimfumu,  
Beno lwatisa Yandi yimpu ya kimfumu  
mutindu Mfumu ya nionso! (Alleluia!)

<sup>88</sup> Ya kieleka, yawu yina beto ke kwikilaka ti Yandi vwandaka. Yinga, tata.

<sup>89</sup> Ntangu yayi ya lombaka ti yandi kwikila mambu yina lenda salama ve, na kulandila mabanza ya ntangu yina. Mutindu mosi mpe beno fwana kwikila mambu yina lenda salama ve, samu na kumona Luzingu ya malu-malu, samu na kumona kima mosi kusalama. Kasi kana Yandi zabaka . . . Yandi zabaka ti Yandi vwandaka Ndinga, na yawu mambu yina lenda salama ve lendaka kusalama, samu Yandi kele Ngangi, mpe ya ke lungisa bima nionso Yandi tubaka.

<sup>90</sup> “Mpe mambu nionso ke salama na bayina lenda kwikila.” Yayi kele Ndinga ya Yandi. Kasi mambu yina lenda salama ve ke monisamaka ntangu muntu me baka Nzambi na Ndinga ya Yandi. Yinga, tata. Ntangu muntu me baka Nzambi na Ndinga ya Yandi, mambu yina lenda salama ve ke—ke salama. Ntangu Nzambi me tuba ti diambu yina ke salama, na yawu beno baka Ndinga yina mpe beno tala kuna, mambu yina lenda salama ve ke salama. Ya kieleka ya ke salama.

<sup>91</sup> Kasi beno tala, ata mpe na nionso yina, yandi tubaka, “Ata mpe na ntangu yayi, Mfumu, nionso yina Nge ke lomba na Nzambi, Nzambi ke sala yawu.” Yandi zabaka ti kana yandi lendaka kuzwa Ndinga yina me katuka na Yandi. Yawu yina kaka yandi zolaka sala, ya vwandaka ti yandi kuzwa Ndinga yango. Yinga, yawu vwandaka ngunga ya yandi ya mudidi mingi, mpe Yesu kwisaka mpe bokilaka. Oh, yinki diambu bawu monaka, mvumbukulu!

Beto tala mambu yankaka kisika bangunga ya mudidi kwisaka.

<sup>92</sup> Kuvwandaka na muntu mosi na ntangu mosi, na nkumbu ya Job, mosi ya bapofete ya ntama na Biblia. Yandi vwandaka muntu ya nene. Yandi vwandaka—yandi vwandaka zola Mfumu, mpe yandi vwandaka sala nionso yandi lendaka sala. Mpe Satana zolaka yungula yandi, na yawu yandi tubaka na Nzambi kilumbu mosi . . . Yinga, ya ke Nzambi yina tubaka na yandi, ti, “Wapi nge me katuka, Satana?”

<sup>93</sup> Yandi tubaka, “Oh, na kuzieta mpe kutambula na zulu ya ntoto.”

<sup>94</sup> Yandi tubaka, “Nge me mona kisadi ya Munu Job? Ya ke na muntu mosi ve mutindu mosi na yandi na zulu ya ntoto. Yandi ke muntu ya kulunga.”

<sup>95</sup> “Oh,” yandi tubaka, “ya kieleka, Nge me pesaka yandi bima nionso, mpe ke salaka bima nionso samu na yandi. Ya kieleka, ya ke muntu ya nene. Kasi pesa munu yandi na ntangu fioti, mu ke

soba nzonzolo ya yandi. Mu ke sala ti yandi singa Nge, na ntwala ya Nge.”

<sup>96</sup> Yandi tubaka, “Nge lenda sala yawu ve.” Tala mutindu Yandi ke tulaka ntima na mukwikidi. Samu na yinki? Yandi ke ya seko. Yandi ke ya Kukonda nsuka. Yandi zaba nsuka kubanda na mbatukulu. Yandi zabaka ti Satana lendaka sala yawu ve. Na yina, Yandi kele Ndinga, Yandi zabaka yina Job ke sala.

<sup>97</sup> Ntangu yayi, beno bambuka moyo, Job, yandi fulusaka yandi na bamputa, yandi fwaka bana ya yandi, yandi bakaka bima nionso yandi vwandaka na yawu. Yandi zimbisaka mavimpi ya yandi. Ata mpe bantu yina lendaka katula yandi mawa kwisaka, mpe bawu lendaka sala kima mosi ve kasi kaka kufundisa yandi ti yandi vwandaka nsumuki na kinsweki. Mpe kiboba yayi ya Job kumaka na kisika yina ya vwandaka mpenza na kiadi mingi.

<sup>98</sup> Ya ke lomba ti beno vwanda na kiadi, ntete. Ya ke lomba ti beno kuma na ntangu yina beno kele na nsuka ya ya nzila.

<sup>99</sup> Job kumaka na nsuka ya nzila, ntangu yandi tubaka, “Mu me singa kilumbu yina mu butukaka. Bika ti mwini kusema ve, mpe bika ti ngonda kusema ve na mpimpa, bika ti nkumbu ya yawu kutangama ata fioti ve.” Mpe na kati ya kiadi yina, na yawu Yesu kwisaka. Yandi kulumusaka meso, mpe yandi tubaka, “Munu yayi, kele muntu, mu ke monaka ti felele ke fwaka, mpe ya ke basika diaka na printemps. Kana yinti mosi me kubwa na mupepe, ya ke basika diaka na nsunga ya masa.” Yandi monaka mutindu bankuna nionso ke vutuka diaka na luzingu, kasi yandi tubaka, “Muntu ke lalaka, yandi ke fwaka, wapi yandi kele?” Yandi zabaka ti yandi vwandaka kiboba ya bakala. Yandi tubaka, “Bana ya yandi ya babakala ke kwisa dila yandi, mpe yandi ke zaba yawu ve. Oh, kana Nge zolaka bumba munu na kati ya ntoni mpe kubumba munu na kisika mosi ya kinsweki, tii kuna makasi ya Nge ke luta. Tudila munu ntangu mpe zengila munu ntangu. Beto kwendaka . . .” Mpe ya landilaka na kutuba, mutindu yina. Yandi kumaka na nsuka ya nzila ya yandi, ya kiadi, “Yinki lendaka salama? Matiti ke zingaka, yawu ke vutukaka na yinti, bafelele ke vutukaka diaka, nionso yankaka ke zingaka diaka, kasi muntu ke lalaka mpe yandi ke fwa!” Yandi vwandaka na kati ya kiadi. Yandi zabaka ve yina lendaka kumina yandi, mpe yandi vwandaka na bamvula yina.

<sup>100</sup> Kaka na ntangu yina, Yesu kwisaka. Nzambi balusaka yintu ya yandi na zulu, mpe yandi monaka Yesu ke na kukwisa na bilumbu ya nsuka.

<sup>101</sup> Na ngunga yina ya mudidi mingi ntangu kento ya yandi tubaka, “Singa Nzambi samu nge kufwa,” kasi yandi tubaka, “Kento, nge ke na kutuba mutindu kento ya zoba. Mfumu pesaka, mpe Mfumu me botula, bika Nkumbu ya Mfumu kusakumuka.” Ata mpe kento ya yandi losaka yandi. Dibundu ya yandi losaka yandi. Bantu nionso losaka yandi.



<sup>102</sup> Na ngunga yina ya mudidi, ntangu yandi zabaka diaka ve wapi yandi lendaka kwenda, Yesu kwisaka. Na yawu yandi bokaka, “Mu zaba ti Mukudi ya munu kele zinga, mpe na bilumbu ya nsuka Yandi ke telama na zulu ya ntoto. Mpe ata ti misobi me bebisa nzutu ya munu, kasi na misuni yayi mu ke mona Nzambi, mu ke mona Yandi munu mosi.” Na ngunga ya yandi ya mudidi, na yawu Yesu kwisaka. Yinga, tata.

<sup>103</sup> Moise, samu na Moise, ngunga ya mudidi mingi kuminaka yandi na Israel. Yandi vwandaka na kati ya kosalu; yandi kutanaka na Nzambi kuna na zulu na mulaka, mpe tubaka na yandi, “MUNU KELE YINA KELE.” Yandi kwendaka kuna mpe nwanisaka bakumekula ya mutindu na mutindu ya Jannes na Jambres, yina vwandaka meka na kumekula kosalu ya yandi. Na nionso yina, yandi vwandaka ya kwikama na Nzambi. Nsuka-nsuka yandi nataka Israel na kukwikila. Mpe tala yandi yina me basika na Egypte, yandi ke na kukwenda na—na ntoto ya nsilulu, kisika Nzambi tubaka, “Nge ke sambila Munu na zulu ya mongo yayi.” Yina vwandaka Ndinga ya Nzambi. Moise zabaka ti yandi ke kwenda kaka na mongo yina. Amen. Nzambi tubaka mutindu yina! Ata Pharaon mosi ve lendaka kufwa yandi. Ata mpeve ya yimbi mosi ve lendaka kufwa yandi. Kima mosi ve lendaka kufwa yandi. Yandi ke na kukwenda na mongo yina. Amen! Alleluia! Mu me kuwa nsatu ya musambidi. Yandi vwandaka kwenda na mongo yina.

<sup>104</sup> Na yawu beto mpe ke na kukwenda na Nkembo! Kima mosi ve ke kanga beto nzila. Ve, tata. Nzambi ke na kusiamisa Ndinga ya Yandi. Mu ke kipé ve yina ke salama, Yandi ke sala yawu, kaka. Yinga.

<sup>105</sup> Yandi vwandaka na nzila, na nzila ya yandi ya kosalu. Yandi yina, ya kukangama na kati-kati ya miongo. Yandi widikilaka mpe yandi waka makelele na manima ya yandi. Yinki yina? Bapusu ya Pharaon, ke na kukwisa, na mafunda; na minduki, mpe matolotolo mpe nionso, samu na kubwisa bawu mpe kuniata bawu. Mpe Nzadi Mbwaki, vwandaka kanga bawu nzila. Yinki yandi salaka? Yandi vwandaka na kia- . . . Yandi vwandaka na kiadi. Bantu nionso vwandaka boka, “Oh, beto me suka ntangu yayi. Pharaon ke fwa beto, yandi ke tobula beto na bambele ya yandi. Ba-bébé ya beto ke fwa awa na kati ya ntoto ya kuyuma.”

Moise bokaka, “O Nzambi!”

<sup>106</sup> Na yawu Yesu kotaka na kosalu. Yandi vwandaka Dikunzi ya Tiya. Ya kieleka. Yandi kulumukaka mpe Yandi telemaka kati-kati ya yandi na kigonsa. Amen. Yandi kele Nzongi ya beto. Yandi kele Yina ke vwandaka na kati-kati ya beto, amen, Muvukisi. Yandi vwandaka kuna, ya kutelema kuna; ya vwandaka mudidi samu na ba-Egyptien, bayina vwandaka kwisa samu na kumeka kusoba diambu yango. Samu na bayayi Yandi vwandaka Nsemo,

samu bawu tambula na yawu. Na yina na suka ntangu mupepe bandaka na kubula ngolo mingi, na mpimpa yina, na yawu yinki Yandi salaka? Yandi kwisaka na mutindu ya Dikunzi ya Tiya.

<sup>107</sup> Beno bambuka moyo ti, Yandi keke kaka Dikunzi ya Tiya yina. Yinga, tata. Ntangu Yandi vwandaka na zulu ya ntoto, Yandi tubaka, “Mu me katuka na Nzambi, mpe Mu ke kwenda na Nzambi.”

<sup>108</sup> Mpe na manima ya lufwa ya Yandi, kuzikama, mvumbukulu, mpe nzanguka; Santu Paul, na nzila ya Damas, ba losaka yandi na ntoto na Dikunzi ya Tiya yayi. Beno bambuka moyo, yandi vwandaka Hebreux. Yandi lendaka tuba mutindu yina ve. . . Yandi tubaka, “Mfumu, Nani Nge keke?” M na kisono ya nene-f-u-m-u, Elohim. “Nani Nge keke yina mu ke na kuniongisa?”

Yandi tubaka, “Munu keke Yesu.”

<sup>109</sup> Amen! Alleluia! Yandi keke ya Ntete mpe ya Nsuka. Yandi keke kaka mutindu mosi. “Na mwa ntangu fioti yinza ke mona Munu diaka ve, kasi beno keke mona Munu. Mu ke vwanda na beno, ata mpe na kati ya beno.” Dikunzi ya Tiya ya mutindu mosi, Nzambi ya mutindu mosi ke salaka kima ya mutindu mosi, na nsilulu ya mutindu mosi, amen, yina ke monisaka Ndinga ya Yandi. “Mu ke Mvumbukulu mpe Luzingu. Mu keke Yina Vwandaka, Yina Keke, mpe Yina ke Kwisa.” Yinga, tata. Yinga.

“Batata ya beto kudiaka mana na ntoto ya kuyuma.”

<sup>110</sup> Yandi tubaka, “Bawu keke, bawu nionso, ya kufwa. Kasi, MUNU KEKE YINA KEKE.” Moise. . . Na mulaka ya tiya, yina vwandaka MUNU KEKE. Yandi keke kaka MUNU KEKE, Munu vwandaka ve; MUNU KEKE, na ntangu yayi, ntangu nionso.

<sup>111</sup> Beto me mona awa ti Moise kangamaka kuna, mpe Klisto kulumukaka. Ntangu yayi, mpe Biblia me tuba mutindu yayi, ti, “Moise monaka ti nsoni ya Klisto vwandaka nene mingi kulutila bima ya ntalu ya Egypte.” Nsoni ya Klisto! Klisto vwandaka Kupakulama, Logos yina basikaka na Nzambi. Wanzio, mutangi nionso ya Biblia zaba ti Wanzio yina vwandaka Klisto. Mpe Yandi vwandaka kuna na ntoto ya kuyuma, mpe Yandi kotaka na kisalu, na mutindu ya lombaka ti Yandi monisama. Nkembo na Nzambi!

<sup>112</sup> Yandi me kwisa bubu yayi na mutindu yango, Klisto yina mosi, me monisama.

<sup>113</sup> Yandi tubaka na bawu ti Yandi keke basisa bawu. Yandi vwandaka sala yawu. Yandi kwisaka kuna samu na kulungisa Ndinga ya Yandi, samu na kusiamisa Yawu. Na yawu na manima ya Yandi kwisaka, mutindu Yandi salaka na Marthe, na yawu Yandi bokilaka. Yandi tubaka, “Moise, samu na yinki nge keke na kuboka na ntwala ya Munu? Tuba na bantu yayi, ti beno kwenda na ntwala.” Na ngunga yina ya mudidi, Nzadi Mbwaki zibukaka mpe bawu zabukaka, kulandila nzietelo ya bawu samu

na kulungisa Ndinga ya Nzambi. Yinga, na ngunga ya mudidi mingi ya Moise, na yawu Yesu kwisaka. Ntangu yayi beto ke na ntangu yayi. . . Mpe Yandi bokilaka Moise.

<sup>114</sup> Beto zola benda bukebi ya beno na mwa muntu yankaka. Nkumbu ya yandi vwandaka Jairus. Bawu kele mingi na yinza bubu yayi. Yandi vwandaka mukwikidi ya kinsweki. Yandi zolaka Yesu. Yandi waka nsangu ya Yandi. Yandi kwikilaka Yandi. Kasi, beno me mona, yandi vwandaka me kukikotisa dezia na organisation. Yinga. Yandi—yandi—yandi—yandi. . . Yandi lendaka ndima yawu pwelele ve. Yandi kwikilaka yawu, kasi yandi lendaka ndima yawu pwelele ve, na yawu yandi vwandaka ya kuvukana na mimpani. Kasi ya kieleka yandi kwikilaka yawu.

<sup>115</sup> Beno zaba, kana muntu me kuma mutindu yina, na ntangu yankaka Nzambi ke nata yandi na kusukisa diambu. Ya ke na ntangu ya kiadi beto ke talisaka mpenza yina ke na kati ya beto.

<sup>116</sup> Na yawu ya vwandaka kuna, yandi vwandaka me vukana dezia na mimpani, mpe yandi kwendaka sonikisa nkumbu ya yandi na buku, mpe nionso yina. Mpe yandi vwandaka nganga-Nzambi, mpe na yawu ya—ya vwandaka mpasi samu na yandi na kundima yawu pwelele, samu yawu yina vwandaka disa yandi. Na yawu, kasi yandi kwikilaka kaka Yesu.

<sup>117</sup> Kilumbu mosi, mwana ya yandi ya kento vwandaka ya kubela. Oh, la la. Yandi, na ntembe ve muntu yango, kana yandi. . . mutindu yina, yandi bokilaka dokotolo. Munganga kwisaka, yandi sansaka mwana yango. Tiya ya nzutu kumaka mingi mpe mingi. Na manima ya mwa ntangu fioti yandi kumaka na tiya mingi na nzutu, mpe nionso yina, na nsuka-nsuka yandi kumaka pene-pene ya kufwa. Yandi vwandaka na kiadi. Ya lombaka ti yandi sala kima mosi. Yandi—yandi zabaka mpenza diambu ya kusala ve. Ntangu yayi yandi banzaka, “Kana mu lenda mona Yandi, konso kisika yina Yandi kele.” Ntangu yayi yandi vingilaka ve ti mpimpa kubwa, mutindu Nicodème salaka, samu na masolo ya bawu zole kaka. Ntangu kumaka ya kusala kisalu, ntangu ya kusala kisalu kumaka mpe ya lombaka ti yandi sala kisalu.

<sup>118</sup> Mpe mu banza, mpangi-bakala, mpangi-kento, ti ya ke mutindu mosi ntangu yayi. Ntangu ya kusala kisalu lungaka. Ntangu lungaka ya kukwikila to ya kukwikila ve. Ndilu ya kukabwana ke kuminaka bakala mpe kento nionso. Ya ke kuminaka mwana nionso. Mbala yankaka ntangu nge ke luta ndilu yango, kima mosi kaka ke bikala, ya ke lusambusu, ntangu nge me luta kati-kati ya mawa na lusambusu, ntangu nge me luta ndilu yango.

<sup>119</sup> Beno bambuka moyo, yandi vwandaka na kiadi. Yandi zabaka ve yinki kusala. Banganga-Nzambi ya yandi vwandaka kuna, ba-rabbin nionso ziungaka yandi. Kimvuka ya bampangi

vwandaka na yandi, bawu nionso vwandaka kuna, ke tala mutindu mwana ya yandi ya kento yina vwandaka pene-pene ya kufwa. Dokotolo vwandaka ya kutelema na nganda, na maboko ya kubundikisa, yandi vwandaka ningisa maboko ya yandi, “Mu me pesa bankisi nionso yina mu me zaba, kasi kaka . . .”

<sup>120</sup> Beno me mona, ya vwandaka Yesu yina vwandaka sala kisalu na ntangu yina nionso. Yesu vwandaka sala yawu na kikuma, samu na kunata muntu na kutalisa yina vwandaka na kati ya yandi. Na manima ya mwa ntangu fioti, mu lenda mona yandi mutindu yandi kwendaka baka mwa yimpu ya yandi ya ndombe mpe yandi lwataka yawu, yandi lwataka kazaka ya yandi ya nganga-Nzambi.

“Nge me kwenda wapi?”

<sup>121</sup> “Mu kele . . . Mu waka ti Yandi kele kuna na nzadi. Mu me kwenda sosa Yandi!” Oh, la la! Yandi me kwenda!

<sup>122</sup> Na ngunga yina ya kiadi, ya lombaka ti yandi baka lukanu: kubika mwana ya yandi kufwa, to yandi zabaka ti kumonisama ya Ndinga kuvwandaka. Yandi vwandaka nganga-Nzambi, mpe yandi tangaka Ndinga, mpe yandi zabaka ti yina vwandaka kumonisama ya Nzambi. Nzambi vwandaka na Klisto, kuvutula yinza na ngwisani na Yandi mosi. Yandi zabaka yawu, mpe yandi tindamaka na ngolo nionso na kundima diambu yango. Ya lombaka ti yandi sala kifu, kubika mwana ya yandi kufwa, to kundima yawu pwelele. Ntangu yandi kumaka na kiadi, yawu vwandaka kaka na ntangu yina Yesu kwisaka. Yandi kwendaka mona Yandi. Yandi tubaka—Yandi tubaka, “Mu ke landa nge, na mambu nionso nge ke tuba.” Mpe kuna na nzila, muntu mosi kwisaka mbangu, diambu yina ya mudidi. Yandi ndimaka pwelele, ti yandi kwikilaka Yandi. Yandi kukibasisaka na dibuundu yandi mosi na ntangu yina, mpe yandi talisaka na meso ya bantu nionso, ti yandi vwandaka mukwikidi ya Yesu.

<sup>123</sup> Mpe awa muntu mosi kwisaka mbangu, yandi tubaka, “Kuyangisa muntu ve, samu mwana ya nge ya kento me kufwa. Yandi fwaka mazono. Yandi me fwa dezia. Ve, kulutisa diaka ntangu ve samu na yawu.”

<sup>124</sup> Mpe, oh, mwa ntima ya yandi zolaka kangama. Kasi yandi talaka mpe yandi monaka meso yina ya Yesu, yandi tubaka, “Mu me tuba yawu na nge ve? Kubanga ve, kana nge zola mona nkembo ya Nzambi. Yinki nge ke na kubanga? Mu me tuba na nge ti Mu ke kwenda.”

<sup>125</sup> Yandi tubaka dezia ti Yandi ke kwenda. Yandi tubaka dezia ti Yandi ke sala diambu yayi, mpe Yandi yayi ke na kusala yawu. Amen. Yandi tubaka ti Yandi ke kota na kisalu na bilumbu ya nsuka mpe ke sala mambu yayi mutindu Yandi salaka, mutindu beto tangaka mpe beto tubilaka yawu mazono na nkokila. Yandi yayi ke na kusala yawu. Yinki nge ke na kubanga?

126 Beno bambuka moyo, ntangu Yandi kwisaka, mpe Yandi bokilaka yandi kuna na bafwa. Yandi kotaka na kosalu mpe bokilaka yandi kuna na bafwa.

Kilumbu mosi, mpofu ya kiboba Bartimée, yandi kumaka na ngunga ya yandi ya mudidi mingi.

127 Yesu vwandaka kuna na nsi, ya yidikaka mwa madia ya suka ya Bantu ya Mumbongo ya Nsangu ya mbote ya Muvimba kuna na—na Jéricho, mpe Yandi vwandaka na Zachée kuna. Yandi kutanaka na yandi na yinti, kuna na bala-bala. Na yawu ntangu Yandi vwandaka . . . Mbote, Yandi lendaka yidika kima yankaka ve, mu ke kwikila mpenza. Beno me mona? Na yawu ntangu Yandi kwisaka kuna, mpe Yandi—Yandi vwandaka na yandi, Zachée kwendaka na Yandi.

128 Mpofu ya kiboba Bartimée vwandaka mpofu kubanda yandi vwandaka mwana ya fioti. Na yawu yandi banzaka ti Yesu lendaka luta na mwelo yina, mpe yandi vwandaka vingila kuna. Na manima ya mwa ntangu fioti yandi waka makelele mingi, mpe bantu yina nionso vwandaka luta.

129 Mpe yandi waka nganga-Nzambi ke tuba, “Hé! Hé, nge, nge yina ke na kumata na mongo kuna! Keti—keti—keti. . . Beto me wa ti nge me vumbula bafwa. Beto ke na maziamu ya kufuluka na bamvumbi awa. Kana nge ke Mesiya, kana nge ke Mesiya, kwisa vumbula bamvumbi yango.”

130 Beno zaba, mpeve yina mosi ya yimbi ke na kuzinga kaka, beno me mona, na mutindu ya nsambululu, na mutindu mosi. Beno me mona?

131 “Kana nge ke Mesiya, beto. . . vumbula bafwa; beto ke na maziamu ya kufuluka na bawu awa. Kwisa.” Mpe, oh, bantu nionso vwandaka boka. Muntu mosi vwandaka boka, “Hosanna na Profete!” Mosi yankaka vwandaka boka mutindu *yayi, yina*, to *yankaka*. Mubulu ya mutindu yayi!

132 Kiboba ya mpofu yayi banzaka, “Oh, mu me kondwa Yawu. Yandi me luta kuna, mpe mu banzaka ti Yandi ke luta awa. Bawu tulaka munu na kisika ya yimbi.” Mpe yandi bandaka na kuboka. Yandi banzaka, “Kana Yandi kele Ndinga, Yandi kele Nzambi; Yandi fwana vwanda mutindu yina.” Na yawu, “O Yesu, Nge Mwana ya David, wila munu mawa!” Na ngunga yina ya kiadi, yandi bokilaka.

133 Ntangu yayi, kana beno zola sonika yawu awa, Yesu vwandaka na Jéricho. Kisika ba me tuba ti yandi vwandaka, yandi vwandaka na ba-metre nkama mosi na makumi tanu na kisika yina Yesu vwandaka. Na mafunda ya bantu yina vwandaka kukipusa pene-pene ya Yandi, Yandi lendaka kuwa ve kuboka ya muntu yina. Ve. Kasi Yandi waka yawu. Yandi telemaka.

134 Mu ke zola kulonga, na mosi ya bankokila yayi: “Na manima Yesu telemaka.” Oh! “Na manima Yesu telemaka.” Oh!

135 Kasi ntangu Yesu telemaka, yinki ya vwandaka? Yandi bokilaka yandi. “Mulongi me kwisa. Baka kikesa,” bantumwa tubaka, “Yandi ke na kubokila nge. Yandi ke na kubokila nge.” Yandi bokilaka yandi na kati ya nkonga ya bantu yina.

Yandi ke na kusala diambu ya mutindu mosi na ntangu yayi. Yayi me kota mbote-mbote? Beno me mona?

136 “Mulongi me kwisa mpe ya ke na kubokila nge.” Mpe Yandi bokilaka yandi katuka na kimpofu tii na nsemo, katuka na mudidi tii na nsemo. Mpe Yandi bokilaka yandi, yandi lutaka na lufwa tii na Luzingu. “Mulongi me kwisa mpe Yandi ke na kubokila nge.” Mpe ntangu Yandi bokilaka yandi, Yandi vutudilaka yandi kumona ya yandi.

137 Na mwa ntangu mosi, ya vwandaka na mwa kento mosi yina vwandaka basika menga, kuna na zulu ya mongo, yandi basisaka mbongo ya yandi nionso, na badokotolo. Yandi, na ntembe ve, bawu tekisaka bangombe. Bawu tekisaka ferme, bawu defisaka yawu. Bawu zimbisaka nionso yina ya vwandaka na yawu na minganga, ata mosi ya bawu ve kusadisaka yandi. Yandi kumaka yimbi mingi mpe yimbi mingi ntangu nionso. Menga vwandaka bika ve na kubasika. Ntangu nionso, ya vwandaka landila kaka mutindu yina, yandi vwandaka bela mingi kaka.

138 Mpe kilumbu mosi, ntangu ya vwandaka kuna ke tunga tiliko, kuna na zulu ya mongo kisika ya vwandaka zinga, yandi talaka na lubwaku, mpe yandi monaka masuwa mosi ke kwisa. Bantu nionso bandaka na kubaka mbangu, “Hosanna na Profete!”

139 Yandi waka nsangu ya Yandi. Lukwikilu ke kwisaka na kuwa. Ntangu yayi yandi tubaka, “Mu ke kulumuka samu na kutala Yandi.”

140 Mpe ntangu yandi kumaka kuna, mpe yandi talaka samu na mbala ya ntete Ndinga ya Nzambi yina me monisama na nzutu, ya vwandaka na kima ya mutindu yankaka na nzonzolo ya Yandi mpe mutindu ya Yandi, tii kuna yandi zabaka ti ya vwandaka Yandi. Yinga, tata. “Oh, kana mu lendaka kaka kubenda bukebi ya Yandi na mutindu mosi, kana mu lendaka kaka kusimba Yandi na mutindu mosi!” Mpe yandi kukikotisaka na kati ya bantu mpe yandi simbaka lele ya Yandi.

141 Ntangu yayi beno bambuka moyo, Yandi waka musapi ya yandi ve. Ve, tata, samu bilele ya ba-Palestinien ke vwandaka nene mingi. Mpe Yandi . . . bawu t- . . .

Pierre tubaka, “Bantu nionso me simba Nge.”

142 Yandi tubaka, “Kasi yayi ke kusimba ya mutindu yankaka. Mu me mona ti Mu me lemba.”

143 Yesu kwisaka. Yandi vwandaka diaka na mbongo ve, yandi vwandaka diaka na kima mosi ve; kasi na ngunga yina ya mudidi ntangu menga kangamaka, mpe badokotolo lendaka kanga yawu ve, Yesu kwisaka. Mpe yinki Yandi salaka? Yandi bokilaka yandi. Yandi talaka bisika nionso tii kuna Yandi monaka yandi, mpe Yandi tubaka, “Nge vwandaka basika menga, kasi yawu me kangama.”

144 “Yandi ke mutindu mosi mazono, bubu yayi, mpe kukonda nsuka.” “Mulongi me kwisa mpe Yandi ke na kubokila nge. Yandi me kwisa mpe Yandi me bokila.” Yandi bokilaka yandi na kuvutuka na mavimpi ya mbote.

145 Kento yayi vwandaka na dibulu ya masa, yina beto tubilaka mazono na nkokila, kivuvu nionso vwandaka diaka ve. Mbala yankaka, mbala yankaka bakala ya yandi ya tanu bikaka yandi, mpe yandi bakaka ya sambanu na mpimpa yina, mpe yandi—yandi vwandaka na mwa ntembe samu na yandi. Na bumuntu, yandi vwandaka ya kubeba. Yandi vwandaka na nsatu ya kuvwanda kento ya mbote; yandi, na ntembe ve, yandi vwandaka tanga Biblia.

146 Mpe yandi vwandaka na nzila samu na kukwenda kuna, pene ya ngunga kumi na mosi. Yandi lendaka kwisa ve na suka-suka ntangu bakento ya mbote ke kwisaka. Mpe bawu vwandaka nata masa ya bawu na zulu ya yintu ya bawu, na mabungu, mpe bawu vwandaka vutuka. Mpe na yawu yandi lendaka kwisa ve, samu na kuvukana na bawu. Bawu, bawu vwandaka ya kukabwana na ntangu yina, yimbi na mbote vwandaka vukana ve. Bantu ya luzingu ya yimbi vwandaka bikala na kisika ya bawu, na yawu yandi lendaka kwisa na bayankaka ve. Ba lendaka pesa yandi muswa ve na kukwisa. Na yawu bantu nionso bakaka masa ya bawu mpe bawu vutukaka. . . Yandi kwisaka sosa kima mosi ya kulutila mbote.

147 Na yawu yandi kumaka kuna na dibungu ya yandi na zulu ya yintu, na ntembe ve ti na nzila yandi ntangu ya vwandaka kwenda, ya vwandaka banza, “Ntangu yayi, bakala yina mu me kwela, to, mu me kuzwa mazono na nkokila, mu ke na kivuvu ya yandi ve. Yandi kele bakala, yandi ke na kusala mambu ya buzoba. Mu—mu zaba yandi ve. Mu me kuzwa siansi ya mbote ve. Bantu ke na kumanga munu na kati ya bawu. Mpe mu lenda kwenda na mabuundu yina ve, bawu ke. . . Tala mutindu bawu kele! Mu zaba ve yinki kusala. Mu ke na kiadi. Mpe mu tangaka Biblia; ya kieleka, kilumbu mosi, Profete yina ke kwisa. Ntangu yayi mu zaba ti bawu ke tubaka ti kima ya mutindu yina kele ve, mpe yayi kele samu, ‘Mbala yankaka samu na bamvula nkama, samu na bamvula mafunda. Beto ke vingilaka yawu kubanda bamvula mafunda, mpe ya me salamaka ntete ve, na yawu beto ke na kulingila yawu ntangu yayi.’ Mambu nionso me kuma mutindu yina, ‘Oh, ve, beto ke na mabuundu mpe bima yankaka. Beto ke na nsatu ya kima ya mutindu yina ve ntangu yayi.’” Na

yawu ntangu yandi vwandaka na nzila kuna, yandi vwandaka banza mutindu yina.

<sup>148</sup> Beno zaba, ntangu beno ke na kubanza na Yandi, Yandi ke monana na beno na ntangu yina. Mutindu beto tubaka mazono na nkokila, ntangu bawu vwandaka kwenda na Emmaüs.

<sup>149</sup> Ntangu yandi banzaka mambu yina, yandi waka Muntu mosi kutuba, “Natila Munu masa ya kunwa.”

<sup>150</sup> Yinki diambu yayi? Na bangunga ya yandi ya mudidi, ntangu bumuntu ya yandi bebaka. Mbala yankaka mwa mama mosi ya kitoko, yina ba losaka na bala-bala samu na kuzinga mutindu yina. Mbala yankaka ya ke kifu ya mwana-kento ve, ya ke kifu ya bibuti ya yandi, yina ke bika yandi kubasika mutindu yina. Mpe yandi vwandaka kuna, mbala yankaka mwa bansuki ya yandi ya kulingama nionso vwandaka ya kukulumuka; yandi vwandaka ya kulemba na nzutu, na nzila, ya vwandaka ya kulemba mingi, muntu mosi ve vwandaka na mfunu ya yandi, mwana yayi, mpe mbala yankaka yandi vwandaka na mambu mingi na manima ya yandi.

<sup>151</sup> Na mutindu nionso, mu zaba kima mosi, yandi tangaka Biblia, mpe yandi kwikilaka Biblia. Mpe ya vwandaka na mwa mbuma mosi na kati ya ntima ya yandi, kutuba, “Kana diambu yango me salama, mu ke zaba yawu.” Ya vwandaka yina ba zabaka na ntuala samu na yawu.

<sup>152</sup> Beno tala muntu yayi Judas mutindu ya vwandaka kuna mpe ya salaka mambu yina yandi salaka. Mudidi vwandaka na kati ya ntima ya yandi. Nsemo vwandaka sema awa na bisalu ya yandi, kasi yandi kwikilaka Yawu ve kuna na kati ya ntima ya yandi. Mpe yandi vwandaka . . . Beno me mona, Nsemo lendaka kulumuka ve kuna na kati. Kasi yandi vwandaka kuna, yandi vwandaka kwikila, yandi kwikilaka Yawu, kasi luzingu ya yandi vwandaka na kati ya mudidi; ntangu Nsemo bulaka, Yawu basisaka mudidi. Kasi ntangu Nsemo bulaka yina, Yawu kumisaka yawu ndombe mingi. Tala luswaswanu.

<sup>153</sup> Beno me mona, yandi butukaka na kikuma. Yandi—yandi tubaka, ntangu Yandi tubaka na yandi ntalu ya babakala ya vwandaka na bawu, yandi . . . Yinki salamaka? Yawu ningisaka yandi mpenza. Yandi kotaka na kiadi. Yandi tubaka, “Tata, mu me mona ti Nge ke Profete. Mu zaba ti ntangu Mesiya ke kwisa, Yandi ke sala mambu yayi.”

<sup>154</sup> Na yawu Yandi bokilaka yandi. Na yawu Yandi bokilaka yandi. “Mu kele Yandi, Yandi yayi ke na kutuba na nge.” Yandi zabaka yawu na nzila ya Ndinga ya Nzambi. Yandi bokilaka yandi na kuluta na masumu ya yandi, tii na Luzingu. Mpe nkumbu ya yandi kele na kati ya Biblia, mpe yandi ke na Luzingu ya seko bubu yayi.

<sup>155</sup> Yandi lenda bokila nge mutindu mosi, samu Yandi kele mutindu mosi mazono, bubu yayi, mpe kukonda nsuka.



<sup>156</sup> Yinga, bumuntu ya yandi kubebaka, kasi yandi zabaka kaka ti Yandi vwandaka na lubakusu yango. Yandi zabaka ti yina lendaka vwanda Mesiya. Na yawu ntangu Yesu tubaka, “Munu kele Yandi, Munu kele Yandi,” yandi zabaka ti ya vwandaka yawu.

<sup>157</sup> Kilumbu mosi bantumwa vwandaka na masuwa, kivuvu nionso vwandaka diaka ve. Bitembo, bawu kwendaka kukondwa Yesu, mpe bitembo vwandaka kaka—kaka mutindu ya vwandaka na yinzo ya Lazare. Kivuvu nionso vwandaka diaka ve. Mwa masuwa yango vwandaka ya kufuluka na masa. Mpe bawu bandaka na kuboka mpe kudila, mpe mbala yankaka bawu vwandaka sambila mpe nionso yina, mpe banzasi vwandaka ngenga, mpe masuwa yango fulukaka na masa, makunzi ya yawu vwandaka ya kubwa, bankayi vwandaka bukana, mpe bawu vwandaka simbana mosi na yankaka, ke dila.

<sup>158</sup> Mpe na ngunga yina ya mudidi mingi, na yawu Yesu kwisaka ke tambula kuna. Kasi Yandi monanaka mutindu diabulu samu na bawu. Yandi monanaka mutindu kima ya kubangisa, mutindu mpeve ya yimbi, mpe bawu bokaka na kubanga.

<sup>159</sup> Yawu yina diambu bubu yayi. Yesu me kwisa na ngunga ya beno ya mudidi, mpe beno ke na kubanga Yawu. Beno me zaba ve yina Yawu kele.

<sup>160</sup> Bawu zabaka ve yina, Yandi vwandaka. Bawu tubaka, “Oh, ya ke mpeve ya yimbi!” Bawu vwandaka boka.

<sup>161</sup> Na manima Yandi bokilaka bawu, ya tubaka, “Beno banga ve, ya ke Munu.” Na ngunga ya mudidi mingi, Yesu me kwisa, Lusalusu ya bawu. Yandi ke salaka kaka mutindu yina, kukwisa na ngunga ya mudidi mingi. Na yawu Yesu kwisaka mpe kukimonisaka Yandi mosi, mpe ya kwisaka na bawu.

Pierre tubaka, “Kana ya ke Nge, tuba ti mu kwisa na zulu ya masa.”

Yesu tubaka, “Kwisa.”

<sup>162</sup> Beno zaba yinki, bankundi? Ntama mingi ve Yandi ke kwisa na bayayi ya bilumbu yayi ya nsuka. Ntangu yayi, ya ke na kuyitukisa ve mutindu dibuundu me kuma diaka na ngunga yayi ya mudidi?

<sup>163</sup> Mu ke tuba kima mosi awa. Ya ke malongi ve. Ya ke kaka kupesa profesu. Beno zaba yina salamaka? Ya ke kuma kisika mosi, ntama mingi ve, beno sonika bandinga ya munu, yina badenomination nionso ke kota na Conseil Oeucuménique. Kana bawu sala yawu ve, ba lenda baka lusalusu ya Conseil yango ve. Na yina, ba ke buyisa mambu, mpe muntu mosi ve lenda kwenda na mabuundu yina, to kukwenda na konso dibuundu yina; kaka kana nge ke na kidimbu ya dibuundu ya beno, nge lenda sumba to kutekisa ve. Beno me mona ti yina salamaka, ya ke salama

diaka, kidimbu ya niama. Mpe dibuundu, ba ke na kubakula yawu, bantu ya kimpeve.

<sup>164</sup> Mpe beno ba-Pentecotiste, ata mutindu yina, beno ke na kundima yawu. Beno me banda na kuwa yawu. Na ntangu mabuundu ya beno, mingi ya ba-organisation ya ba-Pentecotiste; mpe mu ke tanga bankumbu ya beno ve, kasi beno zaba ntangu yayi ti ba ke—ba ke na kukota na kati ya yawu. Ba me pesa kimbangi ti bawu me kota. Mpe ntangu beno me sala mutindu yina, yinki beno fwana sala? Beno ke bika malongi ya beno ya Kupanza nsangu ya mbotika ya Mpeve-Santu. Beno ke bika malongi ya beno ya Biblia.

<sup>165</sup> Mpe bandimi ke ndima diambu yango ve. Baklisto ya kieleka yina me butuka mbala zole ke kufwa, ntete. Ba me kebisa bawu na Ndinga. Bawu zaba ti diambu yango ke kwisa. Yinga, tata.

<sup>166</sup> Mpe ya ke yitukisa ve? Mpe kaka na kati ya ngunga yayi ya mudidi mingi, na yawu Yesu ke kwisa mpe ke bokila beto, ya me tuba, “Beni banga ve. Ya ke Muni. Mu ke kaka na beno. Mu kele awa samu na kumonisa Ndinga ya Muni.” Mutindu Yandi vwanaka na ntangu yina, mutindu mosi Yandi ke na ntangu yayi. Yandi tubaka ti Yandi lendaka sala yawu. Oh, la la! Mulongi me kwisa mpe me bokila beto.

<sup>167</sup> Bambevo mingi kele awa, na ntembe ve, yina me vwanda awa, mpe dokotolo me tuba na beno ti kivuvu kele ve—ve samu na beno. Beno lenda vwanda na ngunga ya beno ya mudidi, kasi, beno bambuka moyo, Mulongi me kwisa mpe bokila beno.

<sup>168</sup> Mpe kilumbu mosi, kilumbu mosi, Mulongi ke kwisa mpe ya ke bokila bankumbu yina nionso me sonamaka na Buku ya Luzingu ya Mwana-dimeme. Kana ya nge kele kuna ve, sonikisa yawu kuna na ntangu yayi, samu Yandi ke kwisa mpe ke bokila. Ata mpe bayina kele na kati ya ntoni ke kuwa Ndinga ya Yandi mpe ba ke vutuka na Luzingu. Mulongi ke kwisa mpe ke bokila beno. Mpe ntangu Yandi ke na kubokila bubu yayi, beno vutula mvutu mpe beno kubama samu na Kilumbu yango, yawu yina ndongisila mu ke na kupesa beno.

<sup>169</sup> Nsilulu ya nsungi yayi, Yandi silaka ti Yandi ke vwanda awa. Mambu yina Yandi salaka, Yandi ke sala yawu diaka, mpe na ntangu yayi diaka Mulongi me kwisa mpe ke na kubokila nge.

<sup>170</sup> Beto kulumusa bayintu ya beto. Mu me bikala na mikanda kulutula pene ya sambanu awa, kasi mu—mu lenda tubila yawu ve na ntangu yayi. Beto kulumusa bayintu ya beto. Mu silaka na beno ti mu ke bika beno na ntangu ya mbote, mpe minuti kumi na tanu me luta dezia.

<sup>171</sup> Tata ya Mazulu, O Mfumu, bika ti yawu salama diaka. Mambu yayi nionso mu me tuba, “Yesu me kwisa mpe ya ke na kubokila nge.” Yinki Yandi ke salaka ntangu Yandi ke kwisaka? Yandi ke bokilaka. Mpe bika ya salama diaka, Mfumu. Bika ti Mpeve-Santu ya Nge kukwisa na kati ya bantu na nkokila yayi,

Mfumu Yesu na mutindu ya—ya Mpeve. Bika Yandi kwisa na nkokila yayi mpe ya kukimonisa pwelele Yandi mosi. Mutindu bantu yina, mutindu bawu kwikilaka, beto ke kwikila, mpe, Mfumu. Bantu mingi kele awa, mbala yankaka, yina me kuzwaka ntete ve ntangu yayi ya mbote. Beto ke sambila ti Nge pesa bawu yawu diaka na nkokila yayi. Samu beto me lomba yawu samu na nkembo ya Nzambi, na Nkumbu ya Yesu. Amen.

<sup>172</sup> Ya kieleka, mpangi-kento, kasi kwenda kaka na ntwala na yawu. Ya ke mbote. Kwenda kaka na ntwala. Oh, beno vwanda swi, bantu nionso.

<sup>173</sup> Beno me kwikila ti Yandi me kwisa? Yandi me kwisa. Yandi ke na kubokila kaka ntangu Yandi me kwisa? Ntangu yayi kana beno lenda kwikila kaka. Kana beno lenda kwikila kaka na Ndinga ya Nzambi, Nzambi ke pesa yawu.

<sup>174</sup> Ntangu yayi beno tala, mu ke na ntangu ve ya kubokila ndonga ya bisambu awa. Mu ke bokila bawu na nkokila yayi, kuna, kana Mfumu kuzola. Mulongi me kwisa. Yandi me kwisa samu na kulungisa Ndinga ya Yandi na kilumbu ya nsuka. Mpe yina Yandi vwandaka na ntangu yina, yawu yina Yandi kele bubu yayi. Yina vwandaka kumonisama to kutalisama ya Yandi na ntangu yina, ya ke mutindu yina bubu yayi, samu Yandi ke kaka Ndinga ya Nzambi. Beno me kwikila yawu? [Dibuundu me tuba, “Amen.”—Mu.] Mpe Ndinga ya Nzambi Ke swasikisaka mabanza, bansatu ya ntima. Mpe mutindu Yandi salaka na ntangu yina, ya ke mutindu mosi Yandi ke salaka ntangu nionso. Yandi ke kaka mutindu mosi. Kana Yandi lenda sala yawu kaka na ntangu yayi, beno ke kwikila Yandi? Ya ke sala ti beno kwikila Yandi?

<sup>175</sup> Beno bayina kele kuna ntangu yayi, beno bika mu tala ntete mpe mu mona kana ya ke na muntu yina mu zaba, muntu mosi yina me vwanda awa na kati, yina mu zaba.

<sup>176</sup> Bantu yina nionso kele na lweka yayi, *awa*, yina me zaba munu ve, beno telemisa maboko ya beno; beno zaba ti mu zaba diambu mosi ve samu na beno, mpe beno kele mbevo, beno telemisa maboko ya beno. Mu banza ti, bantu nionso. Mbote mingi, ntangu yayi, beno kwikila. Beno kwikila kaka na ntima ya beno ya muvimba. Beno tula ntembe ve. Beno vwanda na lukwikilu. Beno kwikila na Nzambi.

<sup>177</sup> Mu ke lomba na beno na kuvwanda ya kieleka swi, beno vwanda. Beno ningana-ningana ve ntangu yayi, mu me bondila beno. Beno me mona? Beno me mona? Beno kele moyo, nzutu, na mpeve. Mpe mpeve ya beno . . . Mpe Mpeve-Santu ke vwandaka na nsoni mingi.

<sup>178</sup> Bantu yikwa ke na kubambuka ti, ya me luta bamvula mingi, ti Mpeve-Santu, ntangu mu lutaka awa mpe mu tubaka na beno? Ntangu mu vwandaka simba bantu na diboko, Yandi tubaka na munu ti kuswasikisa yayi ya mabanza ke kwisa, mpe

ya ke kwenda na ntwala? Beno me bambuka yawu, beno me bambuka yina? Kasi Yandi tubaka, “Kana nge lenda nata bantu na kukwikila na nge.” Beno me bambuka bilumbu yina, bamvula mingi me luta? [Dibuundu me tuba, “Amen.”—Mu.] Beno fwana kwikila.

<sup>179</sup> Mu monaka muntu mosi, mu banza ti ya vwandaka kuna na lukutakanu yina yankaka, ya vwandaka kaka kuna. Mpe Mpeve-Santu. . . Mu vwandaka tala yandi ntangu mu vwandaka longa. Yandi vwandaka kikata. Yandi vwandaka na ba-béquille na nsi ya maboko ya yandi. Mpe kaka na ntangu mu bandaka na kubokila, Satana kwisaka na muntu yango, kivudi ya ndombe. Mpe mu talaka yawu na meso ya munu mosi. Yandi telemaka mpe yandi basikaka. Yandi ke bikala kaka kikata, beno me mona. Mpe na yawu, yandi, ya lendaka beluka kaka na kisika yina kana yandi lendaka—lendaka kaka. . . Beno me mona? Kasi, mbote, mu zaba ve samu na yinki. Mu banza ti yandi widikilaka mbeni. Kasi kana beno telema mpe beno tala bivudi yango, beno tala bima yina ya mutindu na mutindu, mutindu yawu kele, mpe beno tala mutindu ba ke salaka. Beno me mona, ya lendaka vwanda. . .

<sup>180</sup> Ntangu yayi, mu lenda belusa ve. Muntu yina ke tuba na beno ti yandi lenda belusa beno, yandi ke na kifu. Beno me belukaka dezia. Kasi, ya ke diambu ya kuzaba Mwandulu ya Yesu Klisto. Ntangu yayi kana Marthe zabaka ti kana yandi lendaka mona Yandi diaka, ti yandi ke kuzwa nsatu ya yandi, samu Yandi vwandaka Ndinga yina me monisama, beto lenda kwikila yawu mpenza na nkokila yayi, kukwikila yawu? Ya kieleka, beto fwana kwikila yawu. Yandi me kwisa. Yandi me kwisa, Yandi me kwisa na mutindu ya Mpeve-Santu. Yawu Yina Yandi kele. Beno sambila ntangu yayi.

<sup>181</sup> Beno me mona, awa, kana mu vwandaka na muntu mosi awa, kaka pene-pene ya munu awa, yina ke na kusambila kaka—kaka; beno me mona, bantu mingi ke na kusambila, ya ke bisika nionso na kati ya yinzo yayi. Beno fwana tala yawu. Beno lenda tuba ve, “Tuba, Mpangi Branham. . .” Ve, tata. Mu—mu lenda sala yawu ve, mutindu mosi ti beno lenda lotila munu ndosi mosi ve. Beno me mona? Beno lenda lota ndosi mosi. Beno, Nzambi lenda pesa beno ndosi mosi samu na munu, beno ke kwikila yawu, kasi beno lenda sala yawu ve beno mosi. Beno lenda tuba ve, ti, “Mpangi Branham, mu ke lota ndosi mosi samu na nge na ntangu yayi.” Ve, beno lenda sala yawu ve. Mutindu mosi diaka mu lenda mona vision ve. Yina ke pesaka beno ndosi, yandi yina ke sala yawu. Mutindu mosi na vision.

<sup>182</sup> Mu ke na kumona muntu mosi me vwanda awa na nsuka ya ndonga, na arthritis. Kana yandi ke kwikila na ntima ya yandi ya muvimba, Nzambi ke belusa yandi na arthritis. Nge me kwikila ti Yandi ke sala yawu, tata? Ya me vwanda kuna, muntu ya

Mexique, ya me vwanda na nsuka ya ndonga, nge me kwikila yawu? Mbote mingi, tata.

<sup>183</sup> Mama yina me vwanda na ntuala ya nge, yandi mpe ke na arthrite, diaka. Nge me kwikila ti Nzambi ke belusa nge, mama? (*Yayi* ke na kuvutula ndinga? Mu zola ve ti bantu kuwa yawu ve.) Nge me kwikila? Mbote mingi.

<sup>184</sup> Yinki mutindu mama yina ya ntwenia ya Mexique yina me vwanda pene-pene ya yandi? Yandi ke na kimbevo ya estomac. Nge me kwikila ti Nzambi ke belusa estomac ya nge, mama?

<sup>185</sup> Ya me kuzwa yawu. Kana mu me mona Nsemo yango ke kulumuka, yina zola tuba ti yawu me salama. Yinga. Ya ke mutindu yina. Ya me bula yandi. Yawu vwandaka kuna, ya vwandaka baluka-baluka... [Kisika ya mpamba na bande—Mu]. . . ya ke salaka yawu. Beno me mona? Kana Yandi lenda kuta lukwikilu! Beno me mona, “Yandi lendaka sala mambu mingi ve samu na kukondwa lukwikilu ya bawu.”

<sup>186</sup> Awa kele na mama mosi yina me vwanda awa ya ke na kusambila, kaka awa. Yandi kele na boma. Ya fwana vwanda. Yandi ke na kimbevo ya cancer, ya ke ngolo mingi. Mu zaba nge ve, kasi Nzambi kuzaba nge. Nge me kwikila ti Nzambi lenda tuba na munu yina me tala cancer yayi, to diambu yankaka? Tala munu. Ya ke na bantu mingi ke na kusambila, beno me mona, yawu yina mu ke na kutubila. Beno tala beto. Ntangu yayi, yinga, nge ke vwandaka awa ve, yayi ke mbanza ya nge ve. Nge me katuka kisika mosi ba ke bokilaka Porterville, California. Ya kieleka. Nge me kwikila ti Nzambi lenda tuba na munu nani nge kele? Yandi zaba. Nkumbu ya nge kele Mama Wintham. Ya kieleka. Ntangu yayi kwikila, mpe cancer yango ke bika nge. “Kana nge lenda kwikila.” Yawu yina kaka Nzambi me lomba na nge na kusala. “Kana nge lenda kwikila.”

<sup>187</sup> Beno me kwikila yawu ve na ntima ya beno ya muvimba? Muntu mosi na lweka yayi *awa*, nge me kwikila yawu ve? Mulongi me kwisa mpe ya me bokila nge. Yandi ke na kubokila nge na kukatuka na lufwa tii na Luzingu, na kukatuka na kimbevo tii na mavimpi.

<sup>188</sup> Ya ke na muntu mosi me vwanda awa na manima, ya me kulumusa yintu, ya ke na kusambila. Yandi ke na kusambila samu na yandi mosi ve, yandi ke na kusambila samu na muntu yankaka. Ya ke mwana ya kento. Ya ke mwana ya yandi ya kento. Nge me kwikila, tata? Nge ke na mpasi na makulu ya nge. Nge ke na mpasi na dibolongo. Ya kieleka. Nge lenda kudila ve, ya ke Yandi yina kele pene-pene ya nge. Mwana ya nge ya kento kele na lupitalu, mutindu yina ve? Ya ke kimbevo ya tuberculose. Nge me kwikila. Nge me kwikila? Mulongi me kwisa mpe ya ke na kubokila nge. Nge me kwikila, mutindu tata ya yandi? Nge me kwikila? Bika Yandi kwenda kutala yandi na nkokila yayi, na nge mpe. Bika yawu mana.

189 Ya ke na mwana-bakala mosi awa, mwana-bakala na mwa kizizi ya ndombe. Yandi ke na mpasi ya kimbevo ya mpusu, na asthme, mwana-bakala ya Mexique, mwana-bakala ya Mexique yina me vwanda kuna. Yandi ke vwandaka awa ve. Yandi kele ya San Jose. Nge me kwikila, mwana? Kima yankaka, tata ya nge kele awa na nge. Yandi kele longi. Ya kieleka. Nge me kwikila ti Nzambi lenda tuba na munu nkumbu ya nge? Ya ke sala ti nge kwikila ngolo mpenza? Nkumbu ya nge kele Reuben. Kwikila ntangu yayi. Um-hum. Nzambi ke belusa nge.

190 Mulongi me kwisa mpe Yandi ke na kubokila nge. Oh, nsumuki, oh, mbevo, nge ke na kumona ve Mulongi yina me monisama na kati ya bantu, kati-kati ya bakwikidi? Yandi me kwisa samu na kubokila na mavimpi bana ya Yandi yina ke kwikilaka. Yandi me kwisa samu na kubokila nsumuki na kubalula ntima. Retrograde, mundimi ya dibuundu, Mulongi me kwisa mpe ya ke na kubokila nge.

191 Beno me kwikila yawu? Beno me kwikila yawu samu na nsatu ya beno ntangu yayi? Kana beno me kwikila yawu, beno telemisa maboko ya beno, beno tuba, “Mu me kwikila samu na nsatu ya munu.” Na yawu beno telema ntangu yayi mpe beno ndima yawu. Mulongi me kwisa mpe ya ke na kubokila nge. Mpe ata nge kele nani, ata nge ke na konso nsatu yina, Mulongi me kwisa mpe Yandi ke na kubokila nge. Yandi ke mutindu mosi mazono, bubu yayi, mpe kukonda nsuka.

192 Kento yina ya ntwenia kwendaka na mbanza, mpe tubaka, “Beno kwisa, mu me mona Muntu Yina me tuba na munu mambu ya munu ya yimbi.” Beno kwendaka na mbanza ve. Beno me kwisa mpe beno me mona yawu, beno mosi, na yawu Mulongi me kwisa mpe ya ke na kubokila nge.

193 Beno telemisa maboko ya beno mpe beno kumisa Yandi, mpe beno tuba, “Mfumu Yesu, mu ke nsumuki; lemvokila munu. Mu ke retrograde; vutula munu na nzila, Mfumu. Mu ke na nsatu ya Mpeve-Santu; fulusa munu. Mu kele mbevo; belusa munu. Mu ke kikata; belusa munu.” Mulongi me kwisa mpe ya ke na kubokila nge. Beno telemisa maboko ya beno ntangu yayi mpe beno pesa Yandi lukumu. Amen.

194 (Pesa beto mwa note awa, “Mu ke kumisa Yandi, mu ke kumisa Yandi.” Beno me zaba? *Mu Ke Kumisa Yandi*. Beno me zaba yawu, mutindu yina ve?)

Beno me kwikila?

Mu ke kumisa Yandi, mu ke kumisa Yandi,  
Oh, beno kumisa Mwana-dimeme yina  
kufwaka samu na bansumuki;  
Beno pesa Yandi nkembo, beno nionso,  
Samu Menga ya Yandi me sukula masumu  
nionso.

195 Beno zola Yandi? Ntangu yayi beno zola yimbila Yandi ve ntangu Yandi kele awa? Yandi ke Mpeve ya ke na kutambula bisika nionso na kati ya yinzo yayi. Yandi zaba bantima ya beno, mpe zaba nionso samu na beno. Beto yimbila yawu samu na Yandi, na bantima ya beto ya muvimba.

Mu ke sambila Yandi, (beno telemisa maboko ya beno ntangu beno ke yimbila yawu),  
Mu... (ntangu yayi beno kumisa Yandi kaka)... kumisa Yandi,  
Oh, beno kumisa Mwana-dimeme yina kufwaka samu na bansumuki;  
Oh, beno pesa Yandi nkembo, beno nionso,  
Samu Menga ya Yandi me sukula matono nionso.

196 Oh, mama, nge yina me vwanda na kiti ya bambevo, kana nge lenda kwikila kulutula fioti kaka kuna. "Mu..." Beto meka yawu mbala mosi diaka. Mu ke na kuingila kima mosi.

Mu ke kumisa Yandi, mu ke kumisa Yandi,  
Oh, beno kumisa Mwana-dimeme yina kufwaka samu na bansumuki;  
Beno pesa Yandi nkembo, beno nionso,  
Samu Menga ya Yandi me sukula matono nionso.

197 Ntangu yayi na ntangu beto ke na kuyimbila yawu diaka, beno baluka, beno simba diboko ya muntu mosi, na ntangu beto ke yimbila yawu, beto yimbila, "Mu ke kumisa Yandi." Beto kwenda, beto nionso kintwadi ntangu yayi.

Mu ke kumisa Yandi, mu ke kumisa Yandi,  
Beno kumisa Mwana-dimeme yina kufwaka samu na bansumuki;  
Beno pesa Yandi nkembo, beno nionso,  
Samu Menga ya Yandi me sukula matono nionso.

198 Oh, nkundi ya munu nsumuki, nge lenda ve kukwisa awa na ntangu yayi? Beno kwisa mpe beno kumisa Yandi, beno nionso. Beno nionso yina zola kundima Yandi mutindu Mvulusi. Na Mvwandulu ya Yandi, na ntangu basantu ke na kusambila kaka na Mpeve, nge lenda kwisa telema awa ve? Tuba, "Mu zola pesa kimbangi, na nkokila yayi. Mu zola kumisa Yandi. Mu zola kukwisa. Mu ke na nsoni ya Yandi ve. Mu zola ti yinza kuzaba ti mu me ndima Yandi mutindu Mvulusi ya munu, kaka awa na ntangu Yandi kele awa." Beno kwisa na ntangu beto ke yimbila yawu.

Mu ke kumisa Yandi, (nge me zola ve na kukwisa?) Mu ke kumisa Yandi,  
Oh, beno kumisa Mwana-dimeme yina kufwaka samu na bansumuki;

Oh, beno pesa Yandi nkembo, beno nionso,  
Samu Menga ya Yandi me sukula matono  
nionso.

<sup>199</sup> Oh, yawu yina, mama, kwisa ntangu yayi. Nani diaka ke kwisa, na Mwandulu ya Klisto? Kwisa awa, mpangi-kento, telema awa.

<sup>200</sup> Muntu yankaka yina me zola ti Yandi kuvwanda Mvulusi ya nge, na ntangu yayi, yina ke na nsoni ve. Yandi tubaka, “Kana beno ke na nsoni ya Munu na ntwala ya bantu, Mu ke vwanda na nsoni ya yandi na ntwala ya Tata ya Munu mpe Bawanzio ya santu.” Kana nge ke na nsoni ya Yandi ve na ntangu yayi, mpe nge me zola ti Yandi vwanda Mvulusi ya nge, na ntangu Yandi kele awa! Beno me mona Yandi. Ya ke ya kulunga mpenza, Ndinga Yawu mosi ke na kutalisa Yawu. Beno kwisa na ntangu basantu ke na kusambila ntangu yayi. Beno me zola ve na kukwisa?

<sup>201</sup> Nzambi kusakumuna nge, tata. Mama mosi ya kiboba ke na kukwisa, ya me kuma mbuta mingi. Beno me zola ve na kukwisa ntangu yayi?

Mu ke . . . (beno yimbila yawu ntangu yayi) . . .  
Mu ke kumisa . . .

<sup>202</sup> Ya ke mbote, bantwenia, beno kwisa pene-pene awa. Beno kumisa kaka. Nzambi sakumuna nge, mama, ba ke salaka mutindu yina. Nzambi sakumuna beno, bantwenia.

. . . yina kufwaka samu na bansumuki;  
Beno pesa Yandi nkembo, beno nionso,  
Samu Menga ya Yandi me sukula matono  
nionso.

<sup>203</sup> Na ntangu balongi ke na kukwenda na bantu yayi ntangu yayi muntu yankaka lenda kwisa ve? Retrograde, nge lenda kwisa, mpe kutuba, “Mu ke na nsoni ya luzingu ya munu?” Yandi kele awa. Beno me kwikila ti mu ke kisadi ya Nzambi? Beno telemisa maboko ya beno. Mpamba ve, Yesu Klisto kele na kati ya beto. Nge lenda kwisa?

Beno pesa Yandi nkembo . . . (Nge lenda kwisa  
ve, samu na kupesa Yandi nkembo?) . . . beno,  
Samu Menga ya Yandi me sukula . . .

<sup>204</sup> Marthe, nge ke kwisa, to nge ke bikala na yinzo na Marie? Nge ke bikala na organisation, mpe kutuba, “Oh, dibuundu ya munu ke kwikilaka Yawu mutindu yina ve,” ntangu Klisto me monisama? Nge ke bikala na manima samu na kutuba mutindu yina, to nge ke basika? “Mbote, mu ke tuba na nge, ntangu munu . . .” Ve. Bubu yayi, ngunga yawu yayi. Lufwa ke na kubaluka pene-pene ya nge, mutindu mwana ya Jairus ya kento.

<sup>205</sup> Kwisa ntangu yayi! Retrograde, kwisa ntangu yayi. Nsumuki, kwisa ntangu yayi. Ntangu yawu yayi. Mulongi me



kwisa mpe Yandi ke na kubokila nge. Yandi ke na kubokila nge. Nge ke tuba, “Yinki mutindu nge me zaba yawu?” Yandi ke na kusadila ndinga ya munu. Kana Yandi me sadila ndinga ya munu samu na kumonisa pwelele bimbevo, bampasi mpe nionso yina, beno zaba ve ti Yandi ke na kubokila diaka samu na masumu? Beno basika! Beno kwisa ntangu yayi, yayi lenda vwanda ntangu ya beno ya mbote ya nsuka.

<sup>206</sup> Mbala mosi diaka, ya ke na bantu mingi kulutila yina kele awa yina lendaka kwisa, bankundi ya munu. Mu zola yangisa beno ve, na kubokilaka beno mutindu yayi. Yina kele mbote ve. Kana beno na bantangu yankaka mbala yankaka . . . Ba-Pharisien banzaka ti bawu vulukaka, kasi bawu vulukaka ve. Beno ke na kubanza diambu ya mutindu mosi. Kwisa na ntangu yayi.

<sup>207</sup> Beno ndima mpenza! Ve, kumeka ve kubaka yawu na zulu-zulu. Kana ya ke na mwa ntembe na mabanza ya nge, kumeka ve kubaka yawu na zulu-zulu. Kwisa na ntangu yayi. Yayi ke ntangu yango, ntangu yayi na ntangu Kiziba yayi me zibuka, ntangu Mpeve-Santu kele awa. Mulongi me kwisa. Mwa ntembe yina, yawu yina Yandi ke na kumeka na kutuba na beno, “Beno ke na kutula ntembe.” Beno bika yawu. Beno kwisa, ntangu yayi. Mulongi me kwisa mpe ya ke na kubokila nge. Ya kieleka, beno landila kaka na kukwisa, beno landila kaka na kukwisa.

Mu ke kumisa Yandi, mu ke kumisa Yandi,  
(Beno zola kumisa Yandi ve?)

Beno kumisa Mwana-dimeme yina kufwaka  
samu na bansumuki;

Beno pesa Yandi nkembo, beno nionso,  
Samu Menga ya Yandi me sukula matono  
nionso.

<sup>208</sup> Ntangu yayi na ntangu bansumuki ke na kukwisa, samu na kundima Yandi; bika bantu kukumisa Yandi, na ntangu beto ke yimbila yawu ntangu yayi. Beno telemisa maboko ya beno, beno yimbila samu na kukumisa Yandi, ntangu yayi, beto nionso kintwadi.

Mu ke kumisa Yandi, mu ke kumisa Yandi,  
Beno kumisa Mwana-dimeme yina kufwaka  
samu na bansumuki!

<sup>209</sup> Beno kumisa Yandi kaka! Beno yina ke pene-pene awa, beno sambila, beno lomba Yandi na kulemvokila masumu ya beno. Yawu yina Yandi ke sala. Mulongi me kwisa mpe ke kubokila nge. Nzambi kusakumuna beno.



*NA YAWU YESU KWISAKA MPE BOKILAKA* KNG64-0213

(Then Jesus Came And Called)

Nsangu yayi ya Mpangi William Marrion Branham, kulongamaka na Kingelesi, na nokola ya Kilumbu ya yiya, na kilumbu ya 13 ya Ngonda ya zole, na mvula 1964, na Salle ya Elliott na Tulare, California, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)